

1105

255

經30  
8947



二百五五

皇清經解續編卷千九十三

南菁書院

今文尙書經說攷十二

侯官陳喬樞樸園著

周書三

大誓下第六十三

今文尙書

附入

武王乃作太誓告于眾庶

案王鳴盛曰自此以下當是太誓下篇之詞此節似是其

篇首之文句法與湯誓格爾眾庶般庚綏爰有眾牧誓乃

誓予其誓相類凡誓誥篇皆有之故定為經文武王乃死

諡此後人增加孟子手所著梁惠襄齊宣鄒穆滕文魯平

未必皆前卒于孟子當為後人填補春秋絕筆獲麟哀公

見存亦必後人加諡皆其例也

今殷王紂乃用婦人之言自絕于天毀壞其三正離邊其王父母弟乃斷弃其先祖之樂乃爲淫聲用變亂正聲怡說婦人四方之逋逃多罪是宗是長是信是使

周本紀今殷王紂乃用其婦人之言自絕于天毀壞其三正離邊其王父母弟乃斷弃其先祖之樂乃爲淫聲變亂正聲怡說婦人○集解曰馬融曰毀壞三正動逆天地人也○鄭元曰王父母弟祖父母之族必言母弟舉親者言之也

漢書五行志谷永對曰臣聞三代所以喪亡者皆繇婦人羣小書云乃用其婦人之言四方之逋逃多罪是信是使○師古曰周書泰誓也

又谷永傳永對曰臣聞三代所以隕社稷喪宗廟者皆由婦人與羣惡沈湎於酒書曰迺用婦人之言自絕于天四方之逋逃多罪是宗是長是信是使○師古曰此今文泰誓之辭又敘傳班伯曰書云迺用婦人之言○師古曰今文尙書泰誓之辭

又伍被傳曰臣聞箕子過故國而悲作麥秀之歌痛紂之不用王子比干之言也故孟子曰紂貴爲天子死曾不如匹夫是紂先自絕久矣非死之日天去之也○張晏曰箕子時朝周過殷故都見麥及禾黍心悲乃作歌曰麥秀之漸漸兮黍苗之繩繩兮彼狡童兮不與我好兮狡童謂紂也

案伍被以紂不用王子比干之言爲自絕于天其義卽本

於尙書泰誓篇經所云迺用婦人之言自絕于天離湯其  
王父母弟是皆其事也

又禮樂志曰世衰民散小人乘君子心耳淺薄則邪勝正故  
書序殷紂斷弃先祖之樂迺作淫聲用變亂正聲以說婦人  
樂官師瞽抱其器而犇散或適諸侯或入河海

案論衡紀妖篇云衛靈公將之晉至濮水之上夜聞鼓新  
聲者說之師涓撫琴而寫之遂去之晉晉平公觴之施夷  
之臺召師涓援琴鼓之未終師曠聞而止之曰此亡國之  
聲不可遂也平公曰此何道出師曠曰此師延所作淫聲  
與紂爲靡靡之樂也武王誅紂懸之白旄師延東走至濮  
水而自投故聞此聲者必於濮水之上正此經所謂淫聲

變亂正聲者也此事又見禮記樂記鄭注及呂氏春秋孟  
春紀高注江聲曰本紀上文明言武王乃作太誓告于眾  
庶下卽接此文知此是太誓文矣且裴駟采集馬鄭注以  
爲注馬鄭注則故是太誓之注也則其文爲太誓無疑矣  
又漢書谷永傳永引書曰乃用其婦人之言自絕于天師  
古注以爲今文泰誓舉一以反三則其餘從同益可知矣  
新序刺奢篇曰紂爲鹿臺七年而成其大三里高千尺臨望  
雲雨作炮烙之刑戮無辜奪民力冤暴施於百姓慘毒加於  
大臣天下叛之願臣文王及周師至今不行於左右悲夫當  
是時求爲匹夫而不可得也紂自取之也

春秋繁露王道篇曰紂以糟爲邸以酒爲池孤貧不養殺聖

人而剖其心生燔人間其臭剔孕婦見其化斲朝涉之足察其拇一作脛殺梅伯以爲醢刑鬼侯之女取其環誅求無已天下空虛羣臣畏恐莫敢盡忠紂愈自賢周發兵不期會於孟津之上者八百諸侯共誅紂大亡天下

後漢書孔融傳曰紂斲朝涉之脛天下謂爲無道

續漢書律厯志曰紂作淫虐忘其甲子武王誅之

三國志楊阜傳阜上疏曰桀作璇室象廊紂爲傾宮鹿臺以喪其社稷

故今子發維共行天罰勛哉夫子不可再不可三

周本紀故今子發維共行天罰勉哉夫子不可再不可三〇

集解曰鄭元曰夫子丈夫之稱

案江聲曰史記錄尙書輒用訓詁代經文故作勉哉據牧誓篇有四勛字史記錄之皆作勉則此文史記作勉其在太誓原文必實作勛可知矣再更舉也更舉則通前觀兵爲三矣故曰不可再不可三言今必誅紂也

案尙書正義引馬融書敘曰太誓後得案其文似若淺露又云八百諸侯不召自來不期同時不謀同詞及火復于上至于王屋流爲雕五至以穀俱來舉火神怪得毋在子所不語中乎又春秋引太誓曰民之所欲天必從之國語引太誓曰朕夢協朕卜襲于休祥戎商必克孟子引太誓曰我武維揚侵于之疆則取于殘殺伐用張于湯有光孫卿引太誓曰獨夫紂禮記引太誓曰子克紂非子武惟朕

文考無罪紂克予非朕文考有罪惟予小子無良今之太誓皆無此語吾見書傳多矣所引太誓而不在太誓中者甚多弗復悉記略舉五事以明之亦可知矣江聲辨之曰案融之意以太誓非伏生所傳故疑之爾融獨不見伏生之尙書大傳乎太誓維四月太子發上祭于畢云云大傳旣引其文矣其所以不傳者蓋生年老容有遺亡自所得二十八篇之外不能記憶其全故耳大傳引九共曰予辨下土使民平平使民無敖引帝告曰施章乃服明上下能得其片語而不傳其全文是不能記憶之明驗也然則太誓雖不出于伏生不得謂非秦火以前伏生所藏之舊文矣且漢書藝文志云尙書古文經四十六卷爲五十七篇

計伏生書二十八篇三分般庚則爲三十加孔氏多出之二十四篇才五十四加太誓三篇適五十七無太誓則不符其數兩漢諸儒備見今文古文者未嘗疑太誓有今古文之異然則今文太誓同于古文可知矣融獨以其後得而疑之則五十四篇惡在其可信耶若其所傳八百不期而會則婁敬說高帝嘗言之矣司馬子長亦錄其文於本紀矣不旣信而有徵乎又若火流爲雕與穀俱來斯乃符命之應猶龜書馬圖之屬也孔子繫易曰河出圖洛出書聖人則之論語記孔子之言曰鳳鳥不至河不出圖吾已矣夫然則符瑞之徵聖人且覲逆遇之而乃與火流穀至爲神怪謂子所不語豈通論乎且思文之詩不云乎貽我

來舜帝命率育卽此與穀俱來之謂融亦將斥詩爲妄誕乎不然詩則信之書則疑之進退皆無據矣融又以書傳所引太誓甚多而疑此太誓皆無有聲又案湯誓篇傳自伏生旣又出諸孔壁今文古文若合符節而予小子履敢用元牡云云載于墨子篇而湯誓未有其文故孔安國注論語堯曰篇不敢質言湯誓之文而云墨子引湯誓其詞若此又墨子尙賢篇引湯誓曰聿求元聖與之戮力同心以治天下而湯誓中亦無之然而謂湯誓有逸文可也謂湯誓爲僞書則不可也以此相況太誓亦猶是爾夫復奚疑哉不獨此也大傳引般庚曰若德明哉湯任父言卑應言引無逸曰厥兆天子爵今般庚無逸具在而皆無是言

經與傳俱出伏生不應傳述其文經反遺其語然則伏生旣傳之後歐陽夏侯遞有師承猶不能無闕逸況太誓經焚書之餘百年而出反怪其遺逸邪且夫傳記諸書夫人而見之矣苟欲僞造必將摭拾典籍以其補綴依據誼理以爲干城以求讎其欺于後世如彼僞孔氏之所爲矣安肯故畱此閒隙以滋後人之議哉蓋惟當時實有其事史官據事直書故有火流穀至之文逮其後遺文殘闕傳之者謹守殘編而不敢補緝故無諸傳記所引斯何足怪乎季長之說吾不謂然故爲此辨江說是也

又案江聲辨中有云李昉集注尙書于此太誓輒引孔安國曰則孔氏古文亦有此篇安國且爲作傳矣此說誤也

皇清經解續編  
先大夫曰案劉孝標世說新語注卷一引續晉陽秋曰孔  
安國字安國會稽山陰人車騎愉第六子也以儒素見稱  
歷侍中太常尚書遷左僕射特進卒宋書二十禮志太元  
十三年召孔安國爲侍中晉書禮志隆慶四年尚書左僕  
射何澄右僕射王雅尚書車肩孔安國祠部郎徐廣議孝  
武太皇太后李氏服宋書卷十六禮志通典吉禮又引孔  
安國議禘祫殷祭通典凶禮晉孔安國問徐邈皇太子爲  
新安公主服是東晉時別有一孔安國亦通經學李長林  
東晉江夏太守見釋文序錄封樂安亭侯隋書經籍志易類宜與孔安  
國同時故得引其說而孔穎達誤以爲漢之孔臨淮遂無  
能辨之者

皇清經解續編卷千九十二終

太倉畢長慶校  
元和顧光昌校

太倉畢其

皇清經解續編卷千九十四

南菁書院

今文尚書經說攷十三 侯官陳喬樞樸園著

周書四

牧誓第六十四

今文尚書十

時甲子昧爽王朝至于商郊牧摯乃誓

尚書大傳武王伐紂至于商郊停止宿夜士卒皆歡樂歌舞

以待旦

案禮記祭統云舞莫重于武宿夜正義曰舞莫重于武宿

夜者皇氏云師說書傳武王伐紂至于商郊停止宿夜云

云武宿夜其樂名也此據書傳釋武宿夜最確蓋此舞樂

卽象當時士卒之歡樂歌舞也

史記周本紀二月甲子昧爽武王朝至于商郊牧野乃誓○  
徐廣曰二一作正此建丑之月殷之正月周之二月也

案詩大明會朝清明箋云以天期已至兵甲之彊師帥之  
武故令伐殷合兵以清明書牧誓曰時甲子昧爽是鄭以  
詩言會朝清明卽此經之甲子昧爽也說文日部曰昧爽  
旦明誼亦與鄭合荀子儒效篇云武王行日以兵忌東面  
迎太歲至汜而汎至懷而壞至共頭而山隧朝食于戚暮  
宿于百泉厭旦于牧之野呂氏春秋簡逸篇云武王虎賁  
三千人簡車三百乘以要甲子之事于牧野而紂爲禽又  
貴因覽云武王至鮪水殷使膠鬲候周師武王見之膠鬲

曰西伯將何之武王曰將之殷也膠鬲曰竭至武王曰將  
四以甲子至殷郊子以是報矣膠鬲行天雨日夜不休武王  
三疾行不輟軍師皆諫曰卒病請休之武王曰吾已令膠鬲  
之以甲子之期報其主矣今甲子不至是令膠鬲不信也膠  
鬲不信其主必殺之吾疾行以救膠鬲之死也果以甲子  
至殷郊論衡詰術篇云武王以甲子日戰勝紂以甲子日  
戰負據此諸文皆與經所云甲子合也說文土部云塤朝  
歌南七十里地周書武王與紂戰于塤野从土母聲許所  
引周書作塤野據古文也孔穎達正義乃謂皇甫謐云牧  
野在朝歌南七十里不知出何書何其疎於攷據邪

三國魏志注桓階等奏曰傳稱周之有天下非甲子之朝殷

之去帝位非牧野之日也故詩序商湯追本元王之至述姬  
周土錄后稷之生是以受命既固厥德不回  
後漢書郅惲傳惲諫傳俊曰昔文王不忍露白骨武王不以  
天下易一人之命故能獲天地之應剋商如林之旅○注云  
呂氏春秋曰武王伐紂至鮪水紂使膠鬲候周問武王曰何  
日至武王曰將以甲子日至膠鬲行天大雨日夜不休武王  
疾行不輟軍吏諫之武王曰吾疾行以救膠鬲之死也天地  
之應謂夜雨止畢陳白魚入舟之類  
三國魏志注引文帝令曰昔周武大聖也使叔旦會膠鬲於  
四內使召公約微子於其頭故伯夷叔齊相與笑之曰昔神  
農之有天下不以人之壞自成不以人之卑自高以爲周之

伐殷以恭也

案文帝此語本呂氏春秋誠廉篇

王左杖黃鉞右秉白旄以麾曰邊矣西土之人

周本紀武王左杖黃鉞右秉白旄以麾曰遠矣西土之人

案爾雅釋詁邊遠也郭璞注引書曰邊矣西土之人邊之

訓爲遠史記以訓詁代經文故作遠矣西土之人今尙書

釋文及正義本邊字作逖恐非

鹽鐵論繇役篇曰武王之伐殷也執黃鉞誓牧之野天下之

士莫不願爲之用

王曰嗟我友邦冢君

周本紀王曰嗟我有國家君○集解曰馬融曰冢大也

案周禮大宗伯職以賓射之禮親故舊朋友鄭注云天子亦有友諸侯之誼武王誓曰我友邦冢君鄭引此經以證友字則經當作友邦爲是史記有國疑是友國之譌蓋轉寫以音同致誤也

御事司徒司馬司空亞旅師氏千夫長百夫長

周本紀御事司徒司馬司空亞旅師氏千夫長百夫長

案尙書正義引鄭注以千夫長百夫長爲師帥旅帥是師帥者二千五百人之長也旅帥者五百人之長也鄭義是已攷周禮夏官敘官云二千五百人爲師師帥皆中大夫五百人爲旅旅帥皆下大夫故鄭據以爲說王肅好與鄭立異乃以百夫長爲卒長其誼非是

三國志烏丸鮮卑東夷列傳注引英雄記袁紹遣使拜三烏丸版文曰始有千夫長百夫長以相統攝用能悉乃心克有勳力於國家

及庸蜀羌髡微纘彭濮人

周本紀及庸蜀羌髡微纘彭濮人C集解曰馬融曰武王所率將來伐紂也

論衡恢國篇曰武王伐紂庸蜀之夷佐戰牧野

後漢書西羌傳文王爲西伯西有昆夷之患北有獫狁之難遂攘戎狄而戍之莫不賓服乃率西戎征殷之畔國以事紂及武王伐商羌髡率師會於牧野

案詩角弓如蠻如髦毛傳云髦夷髦也鄭箋云髦西夷別

名武王伐紂其等有八國從焉據此則鬣髦古今文之異耳晉常璩華陽國志巴志篇云武王伐紂實得巴蜀之師著乎尚書意以巴蜀總目各國是大名纏今尚書正義本作盧

稱爾戈比爾干立爾矛予其誓王曰古人有言曰牝雞無晨牝雞之晨惟家之索今殷王紂維婦人言是用

周本紀稱爾戈比爾干立爾矛予其誓王曰古人有言曰牝雞無晨牝雞之晨惟家之索今殷王紂維婦人言是用

又殷本紀紂嬖于婦人愛妲己唯妲己之言是從

漢書五行志昔武王伐殷至于牧壑誓師曰古人有言曰牝雞無晨牝雞之晨惟家之索今殷王紂維婦言用○師古曰

周書牧誓之辭晨謂晨時鳴也索盡也言婦人爲政猶雌雞而代雄鳴是喪家之道也

案史記述尚書維婦人言是用漢書五行志引牧誓作惟婦言用少人是兩字疑是歐陽本與大小夏侯本文有微異耳東晉晚出尚書本有是字無人字陸氏釋文不言馬鄭玉本同異知古文作惟婦言是用亦無人字也又外戚傳班婕妤好賦云悲晨雞之作戒○張晏曰書云牝雞之晨惟家之索喻婦人無男事也

劉向列女傳紂好酒淫樂不離妲己妲己所舉者貴之所憎者誅之爲長夜飲妲己好之百姓怨望而諸侯有叛者妲己曰罰輕誅薄威不立耳紂乃重刑辟爲炮烙之法妲己乃笑

武王伐紂斬妲己頭懸之於小白旗上以爲亡紂者此女也  
書曰牝雞無晨牝雞之晨惟家之索

後漢書楊震傳震上疏曰方今九德未事嬖倖充庭書誠牝  
雞牡鳴

又崔琦傳外戚箴曰惟家之索牝雞之晨○又曰暴辛惑婦  
拒諫自孤蝮蛇其心縱毒不辜諸父是殺孕婦是刳天怒地  
忿人謀鬼圖甲子昧爽身首分離初爲天子後爲人螭

自棄厥肆祀不答昏棄厥家國遺厥王父母弟不迪

周本紀自棄其先祖肆祀不答昏棄其家國遺其王父母弟  
不用○集解曰鄭元曰肆祀祭名答問也誓首言此者神怒  
民怨紂所以亡也

厥遺任父母弟不迪

熹平石經厥遺任父母弟不迪

案僞孔本尙書作昏棄厥肆祀不答昏棄厥遺王父母弟  
不迪文與史記不同竊以從史記所述今文尙書昏棄厥  
之下多家國二字於誼爲備若作昏棄厥遺則旣云昏棄  
厥又復云遺詞氣不貫誼亦重複但據隸釋所載漢石經  
殘碑云厥遺任父母弟不迪王字作任未知今文家說如  
何然據史記引今文太誓篇有曰離邊其王父母弟則此  
牧誓篇當亦作王父母弟任字或鐫刻之譌耳惜石經厥  
遺上文闕無以訂其同異疑今文牧誓有脫字史記所述  
蓋子長從孔臨淮問古文尙書或據古文說補之歟

乃維四方之多罪逋逃是崇是長是信是使是以爲大夫卿士俾暴虐於百姓以姦軌于商國

案多罪逋逃泰誓篇作逃逋多罪是崇作是宗段玉裁曰漢書谷永傳引書適用婦人之言自絕于天師古注曰此今文泰誓之辭又引四方之逋逃多罪是宗是長是信是使師古注曰亦泰誓之辭也此正分別謂此十五字非牧誓之辭曰其上文十字出今文泰誓則知其連引之十五字不更端者亦出今文泰誓而非牧誓也今文泰誓小顏時現存何至憤憤指牧爲泰惠氏定字譏之誤也漢書五行志載谷永對亦引書云乃用婦人之言四方之逋逃多罪是信是使師古注曰周書泰誓也據此益可證谷永傳

注非誤此文從節也谷永引書上十字見周本紀所引泰誓下十五字周本紀存之於牧誓而泰誓則去之喬樅謂如段所說則此數語泰誓牧誓兩篇皆有之矣惜石經殘闕而馬鄭王本又亡無以徵其同異存疑焉可也崇谷永引作宗師古曰宗尊也古崇宗字亦通永引經兩見漢書皆逋逃在多罪上然則三家今文本亦有不同者矣

今予發惟共行天之罰今日之事不愆于六步七步乃止齊焉夫子勛哉不愆于四伐五伐六伐七伐乃止齊焉勛哉夫子周本紀今予發惟共行天之罰今日之事不過六步七步乃止齊焉夫子勛哉不過於四伐五伐六伐七伐乃止齊焉勛哉夫子

熹平石經不愆于四伐五伐六伐七伐乃

下闕

案詩大明正義引鄭牧誓注云好整好暇用兵之術也攷禮記樂記篇孔子與賓牟賈論武樂之舞云天子夾振之而駟伐盛威于中國也鄭注云駟當爲四聲之誤也武舞戰象也每奏四伐一擊一刺爲一伐牧誓曰不過四伐五伐又曲禮正義引鄭云伐謂擊刺也始前就敵六步七步當止齊行列及兵相接少者四伐多者五伐又當止齊行列也王鳴盛曰據鄭所引但有四伐五伐不言六伐七伐又曲禮及樂記正義引此經亦皆無六伐七伐且鄭注云多者五伐則不得有六伐七伐疑爲衍文也江聲說與王同喬樞謂石經文見於隸釋所載尙書牧誓殘碑其文有六伐七伐與史記同疑鄭注多者五伐五字乃七之譌僞孔傳云伐謂擊刺少則四五多則六七以爲例其語卽本於鄭注鄭於樂記注引牧誓僅有不過四伐五伐者蓋以證夾振四伐之誼不必全引下句疏引此經蓋亦節取之不得據彼以六伐七伐爲衍文也

今予惟龔行天之罰

班固東都賦曰龔行天罰應天順人斯乃湯武之所以昭王業也

說文力部勛勉也从力旨聲周書曰勛哉夫子

案段玉裁云古音旨勛皆讀如茂是以般庚懋建大命今文作勛建顧命旨貢馬鄭王皆作勛贛也勛讀許玉反非

古音

尙桓桓

周本紀尙桓桓○集解曰鄭元云桓桓威武貌  
後漢書高彪傳曰明其果毅尙其桓桓

案說文犬部云狙犬行也从犬巨聲周書曰尙狙狙狙訓  
犬行則誼非威武貌狙蓋桓之同音假借字古文泰誓作  
狙狙孔安國以今文讀之定為桓字故馬鄭本皆同今文  
作桓桓也爾雅釋訓云桓桓威也卽此經桓桓之訓詩周  
頌云桓桓武志也然則毛詩古文亦作桓矣

如虎如龍如豺如離

周本紀如虎如龍如豺如離○徐廣音義曰離音訓竝與螭

同案此經用皆今文尙書與史記三家今文不同史

班固十八侯銘曰休休將軍如虎如龍

又典引曰虎離其師出史記案此經古文作如虎如龍如熊如龍與三家今文不同史

李記所述歐陽尙書也孟堅所用夏侯尙書也說文豸部云

貔豹屬出貉國从豸毘聲詩曰獻其貔皮周書曰如虎如

貔貔猛獸許據古文尙書故引周書與史記文異禮記曲

禮前有犖獸則載貔貅鄭注引尙書曰如虎如貔正義引

鄭尙書注云其威當如獸之將攫搏也貔一曰豹屬虎類

也鄭引尙書作貔與許所引文合漢書敘傳述翟方進傳

云義得其勇如虎如貔班習夏侯尙書者據十八侯銘作

今文尙書經說攷十三

如虎如羆則敘傳文當亦同作羆不當作貔豈大小兩夏  
侯本與歐陽本又各有不同歟然則鄭注禮記所引尙書  
或亦出大小夏侯今文不必定爲古文也

如豺如螭

後漢書竇憲傳班固燕然山銘曰螭虎之士

又杜篤傳篤論都賦曰虓怒之旅如虎如螭

李善文選西都賦注歐陽尙書說曰螭猛獸也

如豺如羆

說文內部曰羆山神獸也从禽頭从内从艸歐陽喬說羆猛

獸也

案此所引用皆今文尙書也段玉裁云歐陽尙書唐初已

不存李蓋於各家注記得之與說文引歐陽喬說正合正

牧誓說也徐廣注史記云離音訓並與螭同當云離音訓

並與羆同羆正字離螭皆假借字螭之正訓說文云若龍

而黃也一曰無角曰螭齊太公世家及六韜非龍非虺虺

卽螭之別字也破玉記鄭注羸者虎豹貔螭爲獸淺毛者

之屬左傳服注螭或曰如虎而噉虎此皆猛獸之說也喬

縱謂據說文羆字訓云云則文選注所引歐陽尙書說卽

于商歐陽喬之說攷漢書儒林傳歐陽和伯之曾孫名高字子

陽爲博士繇是尙書有歐陽氏學歐陽喬當卽歐陽高喬

高字形相似而音義又俱相近二字古得通用歐陽章句

經典釋文序錄云歐陽高始爲之則說文所引歐陽喬說

即歐陽章句也歐陽尚書今文作馮說文所傳其正字也  
文選注引歐陽說作螭其假借字也螭爲龍之無角者與  
龍同類馮爲獸之淺毛者與虎同類也

于商郊弗禦克犇以役西土林鄭則則味自之會將各高字于  
周本紀于商郊弗禦克犇以役西土○集解曰鄭元曰禦疆  
禦謂疆暴也克殺也不得暴殺紂師之犇走者禮之備也  
案偽孔傳本作御釋文云馬作禦禁也役馬云爲也正義  
云王肅讀御爲禦言不禦能奔走者王鳴盛曰馬王訓皆  
非鄭解深得之言不暴殺來奔之人則商人皆爲西土之  
役矣陳于野而不用權詐見其正步伐止齊見其整不殺  
降見其仁三者皆王師之仁所以異於霸術也

爾所弗勛其于爾躬有戮

周本紀爾所不勉其于爾身有戮○集解曰鄭元曰所言且  
也曰檢張天可傳爾躬人衣西又其對武也莫不其勉爾

本紀又曰誓曰諸侯兵會者車四千乘陳師牧野使師尚父  
與百夫致師以大卒馳帝紂師紂師雖眾皆無欲戰之心心  
欲武王亟入紂師皆倒兵以戰以開武王武王馳之紂兵皆  
崩畔紂紂走反入登于鹿臺之上蒙衣其珠玉自燔于火而  
死

尚書大傳大戰篇曰武王與紂戰于牧之野紂之卒輻分紂  
之車瓦裂紂之甲魚鱗下賀乎武王

漢書律厯志武王書經牧誓武王伐商紂水生木故爲木德

天下號曰周室

淮南本經訓曰晚世之時帝有桀紂桀為璇室瑤臺象廊玉  
牀紂為肉圃酒池燎焚天下之財罷苦萬民之力劓諫者剔  
孕婦攘天下虐百姓於是湯乃以革車三百乘伐桀於南巢  
放之夏臺武王甲卒三千人破紂牧野殺之於宣室天下甯  
定百姓和集是以稱湯武之賢由此觀之有賢聖之名者必  
遭亂世之患也○注云革車兵車也南巢今廬江巢縣夏臺  
大臺牧野地名在朝歌城外宣室殷宮名  
又曰紂兼天下朝諸侯人迹所及舟楫所通莫不賓服然而  
武王甲卒三千人擒之于牧野豈周民死節而殷民背叛哉  
其主之德義厚而號令行也

說苑指武篇曰武王將伐紂召太公望而問之曰吾欲不戰  
而知勝不卜而知吉使非其人為之有道乎太公對曰有道  
王得眾人之心以圖不道則不戰而知勝矣以賢而伐不肖  
則不卜而知吉矣被害之我利之雖非吾民可得而使也武  
王曰善乃召周公而問焉曰天下之圖事者皆以殷為天子  
以周為諸侯以諸侯攻天子勝之有道乎周公對曰殷信天  
子周信諸侯則無勝之道矣何可攻乎武王忿然曰汝言有  
說乎周公對曰臣聞之攻禮者為賊攻義者為殘失其民則  
為匹夫王攻其失民者何攻天子乎武王曰善乃起眾舉  
師與殷戰于牧之野大敗殷人上堂見玉曰誰之玉也曰諸  
侯之玉即取而歸之於諸侯天下聞之曰武王廉於財矣入

室見女曰誰之女也曰諸侯之女也卽取而歸之於諸侯天  
下聞之曰武王廉於色矣於是發巨橋之粟散鹿臺之財金  
錢以舉士民黜其戰車而不乘弛其甲兵而弗用縱馬華山  
放牛桃林示不復用天下聞者咸謂武王行義於天下豈不  
大哉言武王伐紂過隧斬岸過水折舟過谷發梁過  
說苑權謀篇曰武王伐紂過隧斬岸過水折舟過谷發梁過  
山焚萊示民無返志也至於有戎之隧大風折旆散宜生諫  
曰此其妖與武王曰非也天落兵也風霽而乘以大雨水平  
地而嗇散宜生又諫曰此其妖與武王曰非也天洒兵也卜  
而龜燔散宜生又諫曰此其妖與武王曰不利以禱祠利以  
擊眾是燔之已故武王順天地犯三妖而禽紂於牧野其所

見者獨精也

卷之六十四

元明書局影印

論衡卜筮篇曰周武王伐紂卜筮之逆占曰大凶太公推蓍  
蹈龜而曰枯骨死草何知吉凶夫卜筮兆數非吉凶誤也占  
之不審吉凶吉凶變亂變亂故太公黜之夫蓍筮龜卜猶聖  
王治世卜筮兆數猶王治瑞應瑞應無常兆數詭異詭異則  
占者惑無常則議者疑疑則謂平未治惑則謂吉不良何以  
明之夫吉見兆數吉人可遭也治遇符瑞聖德之驗也周武  
王伐紂遇烏魚之應其卜曷爲逢不吉之兆使武王不當起  
出不宜逢瑞武王命當興卜不宜得凶由此言之武王之卜  
不得凶占謂之凶者失其實也洪範稽疑卜筮之變必問天  
子卿士或時審是夫不能審占兆數不驗則謂卜筮不可信

皇清經解續編卷千九十四終  
用象無不然兆無不審人之知闇論之失實也傳或言武王  
伐紂卜之而龜燹占者曰凶太公曰龜燹以祭則凶以戰則  
勝武王從之卒克紂焉蓋兆數無不然而吉凶失實者占不  
巧工也  
問之夫吉良兆燹吉八四數也  
古者無常限  
王命世中  
之不審吉凶吉凶變  
皇清經解續編卷千九十四終  
太倉畢長慶校  
元和顧光昌校

皇清經解續編卷千九十五

南菁書院

今文尚書經說攷十四上

侯官陳喬樞樸園著

周書六

鴻範第六十六

今文尚書十一

十一之上

惟十有三祀王訪于箕子

尚書大傳武王勝殷繼公子祿父釋箕子囚箕子不忍周之  
釋走之朝鮮武王聞之因以朝鮮封之箕子既受周之封不  
得無臣禮故於十三祀來朝○注云祿父紂之子也武庚字  
箕子走之朝鮮誅我君而釋己嫌苟免也朝鮮今樂浪  
史記周本紀武王已克殷後二年問箕子殷所以亡箕子不

忍言殷惡以存亡國宜告武王亦醜故問以天道  
漢書律厯志洪範篇曰惟十有三祀王訪于箕子

又五行志禹治洪水賜洛書法而陳之洪範是也聖人行其道而寶其真降及于殷箕子在父師位而典之周既克殷以箕子歸武王親虛己而問焉經曰惟十有三祀王訪于箕子班固賓戲曰昔咎繇謨虞箕子訪周言通帝王謀合聖神風俗通皇霸篇尚書武王戎車三百兩虎賁八百人擒紂於牧之野惟十有三祀王訪于箕子

三國魏志注引辛毗等奏曰天文因人而變至於河洛之書著於洪範則殷周效而用之矣斯言誠帝王之明符天道之大要也

王迺言曰於乎箕子惟天陰隲下民相協厥居我不知其彝倫

適敘

史記宋世家武王既克殷訪問箕子武王曰於乎維天陰定下民相和其居我不知其常倫所序

烏嘽箕子

漢書五行志王迺言曰烏嘽箕子惟天陰隲下民相協厥居我不知其彝倫適敘○服虔曰隲音陟○應劭曰陰覆也隲升也相助也協和也倫理也攸所也言天覆下民王者當助天居我不知居天常理所次序也

呂氏春秋君守篇鴻範曰惟天陰隲下民陰之者所以發之也○高誘注曰陰陽升陟也言天覆生下民王者當助天舉

發明之以仁義也

案史記訓隲爲定當本歐陽尚書說書正義引王肅云陰  
大深也言天深定下民與之五常之性王者當助天和其居  
所行天之性我不知常道倫理所以次敘是問承民順民  
何所由與服虔應劭高誘訓誼並異而於史記爲合王肅  
蓋亦據歐陽章句爲說也書釋文引馬融云陰覆也隲升  
也升猶舉也舉猶生也與應劭高誘解同然則馬蓋從夏  
侯說歟史記引書作於乎漢書引經作烏嘒此歐陽夏侯  
三家之本不同也段玉裁曰高注陰陽升陟也當是陰覆  
陟升也之誤隲者陟之假借字故注作陟爾雅釋詁隲升  
也史記作定按隲不訓定疑今文尚書本作質故司馬訓

爲定喬樅攷漢書五行志師古注云隲音質隲定也此必  
宋王肅尚書注有隲讀爲質之語故師古據以注五行志耳  
箕子迺言曰我聞在昔鯀陞鴻水汨陳其五行

宋世家箕子對曰在昔鯀陞鴻水汨陳其五行

漢書五行志箕子迺言曰我聞在昔鯀陞洪水汨陳其五行  
○應劭曰陞塞也汨亂也水性流行而鯀障塞之失其本性  
所陳皆亂故曰汨陳其五行也  
尚書大傳曰汨亂也

案此見華嚴音義當是洪範傳汨陳五行之訓攷說文水  
部云汨治水也古訓有反義故治之反爲亂也

鯀伊鴻水曰陳其五行

熹平石經口伊鴻水曰陳其五行帝 下闕

案隸釋載今文尚書殘碑陘字作伊汨字作曰不同者段

玉裁曰蓋陘伊雙聲相假借說文土部曰陘塞也从土西

尚聲商書曰絲陘洪水壑古文陘按古文陘字从古文西蓋

陘壁中古文如是小篆易壑為陘玉篇土部陘於仁切書曰

○絲陘洪水孔安國曰陘塞也據此則尚書孔傳本作陘與

說文合衛包乃改為陘字段說是也汨說文从水曰聲蔡

邕石經作曰卽汨之消借也 本經刻其正音此說尚疑

帝乃震怒弗昇鴻範九疇彝倫攸斁 則其正音也

宋世家帝乃震怒不從鴻範九等常倫所斁○徐廣曰斁一

作釋○裴駟曰按鄭元曰帝天也天以絲如是乃震動其威

怒不與天道大法九類言王所問所由敗也 不詳其文

漢書五行志帝乃震怒弗昇洪範九疇彝倫攸斁

案說文步部云燁敗也从步畢聲商書曰彝倫攸燁則燁

乃正字斁其假借字也徐廣史記音義云斁一作釋釋字

當卽燁之譌段玉裁曰九疇史記作九等此以訓詁之字

代其本字也漢書宣帝紀復其後世疇其爵邑張晏曰律

非始封十減二疇者等也言不復減也此疇訓等之證其

實與疇類也無二說文等齊簡也

彝倫攸燁

班固典引曰彝倫燁而舊章缺 燁代燁

案據典引文知夏侯尚書本亦作彝倫攸燁也

後漢書袁紹傳劉表以書諫譚曰彝倫攸斁

鯀則殛死禹迺嗣興天迺錫禹鴻範九疇彝倫攸斁

宋世家鯀則殛死禹迺嗣興天迺錫禹鴻範九疇彝倫攸斁  
五行志鯀則殛死禹迺嗣興天迺錫禹鴻範九疇彝倫攸斁  
此武王問雒書於箕子箕子對禹得雒書之意也

案尚書釋文云殛紀力反本又作極段玉裁曰作極者是也劉向以堯典四罪放流竄殛爲四放之罰虞書殛鯀于羽山王逸楚詞天問注言堯長放鯀於羽山絕在不毛之地三年不舍其罪也詩小雅菀柳後予極焉鄭箋云極誅也王信讒不察功考績後反誅放我是言王刑罰不中不可朝事也正義曰極誅釋言文此釋言極不作殛之明證

也夏本紀云舜行視鯀之治水無狀乃殛鯀於羽山以死此語最爲明晰因殛而死非訓殛爲殺也魏志武帝紀致屈官渡裴注云詩曰致天之屆于牧之野鄭元云屆極也鴻範曰鯀則極死裴所據者鄭注古文尚書也祭法正義引鄭答趙商云鯀非誅死鯀放居東裔至死不得反手朝禹乃其子也以有聖功故堯興之若以爲殺人父用其子而舜禹何以忍乎而尚書曰鯀則殛死禹乃嗣興者箕子見武王誅紂今與已言懼其意有慙德爲說父不肖則罪之子賢則舉之以滿武王意也此鄭發明鯀因極而死非帝欲殺之喬樅謂諸所引書皆作殛字說文步部曰殛殊也从步亟聲虞書曰殛鯀于羽山許所傳虞書古文尚書

也鄭注古文尙書讀極爲極極誅也極殊也古文尙書作  
極者極之假借字也極字當本於三家今文故鄭讀從之  
觀高誘王逸諸儒皆以極爲放是今文家書說作極誅解  
永嘉以後三家尙書亡而馬鄭王本尙書盛行於世學者  
多見作極字少見作極字故凡經史及諸子百家皆傳寫  
從極耳

又敘傳曰河圖命庖洛書賜禹八卦成列九疇適敘○李奇  
曰洛書卽洪範九疇也

論衡正說篇曰禹之時得洛書書從洛水中出洪範九章是  
也禹案洪範以治洪水

案山海經云岷山之首曰女几山洛水出焉東注於江漢

書地理志廣漢郡雒縣云章山雒水所出南至新都谷入  
湔華陽國志云李冰道洛通山洛水出灑口經什邡攷漢  
志廣漢郡屬縣有汁方應劭曰汁音十近儒臨川紀大奎  
爲四川什邡令嘗作什邡考云自秦漢已有什邡之名不  
詳其義今縣北有雒縣舊址以雒水得名水源在萬山中  
眾流交絡邑乘云三江口山內有九聯坪雒流屈曲環繞  
禹王廟禹母祠基在焉古碑屹立字跡不可辨疑秦漢閒  
物相傳禹母居此帝王世紀禹生廣柔縣石紐鄉劄兒坪  
今其地無可攷或云在石泉又云在汶川距章洛皆不遠  
雒洛古相通用余惟神禹降生天必錫之苞符洛書之出  
或當在此河圖圓象天洛書方象地易曰著之德圓而神

卦之德方以智著以圖衍卦從書列蓋洛書八方方皆合  
十一與九合十六與四合十七與三合十二與八合十初  
出之時疑卽名之曰十方猶河圖之言五位也此地既有  
洛書之祥意十方之名必藉藉久著秦郡縣天下取以名  
地加偏旁爲什邡什亦作邶卅汁並音十邡亦作防並音  
方世遠遐陬紀載無存後世遂失其自以洛爲河南之洛  
不復詳考矣又作洛水攷云女几古山名今不可攷要其  
爲漢志水經注雒縣章山之雒水固無可疑爾雅釋山曰  
上正章疏云山形上平者名章今沂雒水發源之處九嶺  
危峻人跡罕到山嶺多上平疑九嶺卽章山也雒水發源  
九嶺山環繞東北七八十里逕九聯坪東南會章水至高

景關出山口名曰雒口河流遂大華陽國志云蜀王杜宇  
稱帝以褒斜爲前門熊耳靈關爲後戶玉壘峩嶷爲城郭  
江潛綿洛爲池澤此當日洛水之爲鉅觀也後世引水灌  
田自關口以外分而爲官渠諸河于是正河淺涸遂不知  
有山海經水經之舊矣余惟河圖洛書伏羲大禹之瑞而  
岷山女兒之洛與河南謹舉之洛並著山海經禹固汶山  
郡人史記岷山作汶山然則洛出書之爲岷山以南之洛  
而非必其爲河南謹舉之洛固事與理之可信者又因洛  
水及什邡名義證之於洛書方方合十之應固不能置之  
於不論也喬樅謂天生神禹靈龜出洛洛書八方合十祥  
瑞之符實爲禹應禹生於汶川紀氏以出書之洛水當在

蜀地什邡其說固非無徵也

趙岐孟子滕文公篇注洪範曰彝倫攸序謂其常事有序者也

三國志管甯傳曰下阜羣生彝倫攸敘  
鴻範五行傳曰維王后元祀帝令大禹步于上帝維時洪祀六沴用咎于下是用知不畏而神之怒若六沴作見若其禦帝用不差神則不怒五福乃降用章于下若六沴作見若不其禦六伐既侵六極其下禹乃其辟厥德受命休令爰用五事建用王極○注王謂禹也后君也祀年也禹始居攝為君之年也帝舜也步推也于於也上帝謂天也令禹推演天道謂覩得失反覆也用此時始大祀六沴之用咎于下者咎

凶也其祀之令消也若是順也其讀曰恭禦止也降下也章明也侵陵也辟明也厥其也休美也禹於是恭明其德孳孳受舜之美令奉行之王極或皆為皇極初禹治水得神龜負文於洛於以盡得天人陰陽之用至是奉帝命而陳之也漢書五行志易曰天垂象聖人象之河出圖雒出書聖人則之劉歆以為慮羲氏繼天而王受河圖則而畫之八卦是也禹治洪水賜雒書法而陳之洪範是也

案論語河不出圖何晏集解引孔安國曰河圖八卦是也易繫辭云河出圖洛出書聖人則之李鼎祚集解引鄭元曰春秋緯云河以通乾出天苞洛以流坤吐地符河龍圖法洛龜書成河圖有九篇洛書有六篇也據此諸說則鴻

範出於雜書今文家古文家說並相同矣

初一日五行次二曰羞用五事次三曰農用八政次四曰叶用五紀次五曰建用皇極次六曰艾用三德次七曰明用稽疑次八曰念用庶徵次九曰嚮用五福畏用六極

宋世家初一日五行二曰五事三曰八政四曰五紀五曰皇極六曰三德七曰稽疑八曰庶徵九曰嚮用五福畏用六極

○集解曰馬融云言天所以畏懼人用六極

漢書五行志初一日五行次二曰羞用五事次三曰農用八政次四曰叶用五紀次五曰建用皇極次六曰艾用三德次七曰明用稽疑次八曰念用庶徵次九曰嚮用五福畏用六極凡此六十五字皆雜書本文所謂天迺錫禹大法九章常事所次者也○張晏曰農食之本食爲八政首故以農爲名也○應劭曰叶合也合成五行爲之條紀也皇大也極中也艾治也治大中之道用三德也疑事明攷之於蓍龜天所以嚮樂人用五福所以畏懼人用六極

案尚書釋文引馬云從五行已下至六極洛書文也則初一日等二十七字是禹所加本文惟三十八字今據漢書五行志則以自初一日以下皆洛書之文兩說不同馬融從古尚書說故與今文家異五行志明言攬仲舒別向歆傳載眭孟夏侯勝京房谷永李尋之徒所陳行事是志所引經傳皆用今文尚書說也

漢書藝文志五行者五常之形氣也書云初一日五行次二

曰羞用五事言進用五事以順五行也貌言視聽思心失而五行之序亂五星之變作皆出於律厯之數而分爲一者也漢書孔光傳光對曰書曰羞用五事建用皇極如貌言視聽思大中之道不立則咎徵薦臻六極屢降皇之不極是謂大中不立其傳曰時則日月亂行謂眇側慝甚則薄蝕是也○孟康曰眇行疾側慝行遲也

案羞用五事句漢書五行志引書凡兩見又孔光傳引經文同藝文志引此經亦作羞而釋以進用則作羞字其來已舊矣鄭君詩小雅小緝箋引此經作敬用五事與漢書文異段玉裁曰按作敬者古文尙書也作羞者今文尙書也班氏羞訓進今文家說也古文敬字從古文苟與羞皆從羊詩小雅鄭箋云欲王敬用五事此從古文尙書說也江聲曰羞當爲苟說文苟部云苟自急勅也从羊省从包省从口口猶慎言也从羊羊與義善美同意案五事乃切身之事人當自整勅者古文苟字作着與羞相似故誤也江說亦通說文支部敬肅也从支苟肅卽整勅之意或三家今文亦有作敬者故鄭君詩箋據之以爲言耳

又案農用八政尙書釋文引馬云食爲八政之首故以農名之僞孔傳云農厚也厚用之政乃成正義引鄭元云農讀爲醲則農是醲意故爲厚也王肅從馬說張晏注漢書亦與馬訓同顏師古曰此說非也農厚也羞用義例皆同非田農之義也喬縱攷說文西部云醲厚酒也又衣部云

禮衣厚貌醴禮皆從農得聲而義並訓爲厚則農本有厚  
誼可知矣馬王皆治古文尙書其主田農爲義者古文說  
也鄭君讀農爲醴當是從今文家說惜正義引鄭注文不  
具僞孔傳農厚也云云必是漢儒舊說如此而僞孔氏襲  
用之耳

又案協用五紀五行志作叶此三家尙書之間存有古文  
者師古曰叶讀曰叶和也攷說文荔部云荔同力也从三  
力協騶協叶叶皆荔之重文協同心之和也从荔从心騶  
同思之和也从荔从思協眾之和同也从荔从十叶古文  
協从曰十叶亦古文从口五行志叶字正古文協也此但  
當云叶與協同小顏不知漢人作注言讀爲讀曰皆是易  
其字而妄效之宜其爲段氏懋堂所譏也

又案說文卜部云卜以問疑也从口卜讀與稽同書云  
叶疑許所傳書作叶據古文尙書也史記漢書載洪範今  
文並作稽蓋同音假借字段氏玉裁以說文書云叶疑四  
字爲大徐妄增此不然也攷說文繫傳曰尙書明用叶疑  
今文借稽字小徐所引正據說文言之若郭忠恕汗簡及  
夏竦古文四聲云稽古尙書作乚此則依傍字部改變經  
文之本未可信從當以說文爲正

熹平石經口口曰建用皇極次六曰艾用三德

下闕

案洪範五行傳王極鄭注云王或皆爲皇攷白虎通號篇  
曰皇君也美也夫也皇之訓爲君亦爲大故孔光谷永說

皇極並以大中爲訓此歐陽夏侯三家之本不同也洪範五行傳王之不極是謂不建鄭注云王君也漢書五行志引洪範傳皇之不極是謂不建云皇君也極中建立也字異訓同據中興書目引鄭康成尙書大傳敘曰蓋自伏生也伏生爲秦博士至孝文時年且百歲張生歐陽生從其學而授之音聲猶有譌誤先後猶有差舛重以篆隸之殊不能無失伏生終後數子各論所聞以己意彌縫其闕別作章句又特撰大義因經爲指名之曰傳劉子政校書得而上之凡四十篇至元始詮次爲八十三篇此三家今文所以不能無少異同之處也今據隸釋載漢石經尙書殘碑作皇極作艾用皆與漢志文同是知作王極者歐陽氏之本作皇極者夏侯氏之本也漢志艾用師古注曰艾讀曰艾案隸古定本作艾攷說文ノ部云艾芟草也从ノ从ノ相交艸部云艾冰臺也从艸又聲辟部云艾治也从辟又聲然則艾是芟草艾是艸名與艾之訓治異以同从艾聲故艾或消借作艾或通借艾字爲之依應氏訓誼則字當作艾依古書假借則字通作艾魏晉以來俗所用者皆但作艾而艾之正字遂廢矣

### 饗用五福

漢書谷永傳永對曰竊聞明王卽位正五事建大中以承天心則庶徵序于下日月理于上如人君淫溺後宮般樂游田五事失于躬大中之道不立則咎徵降而六極至凡災異之

發各象過失以類告人。○又曰臣聞災異天所以譴告人君過失猶嚴父之明誠畏懼敬改則禍銷福降忽然簡易則咎罰不除經曰饗用五福畏用六極傳曰六沴作見若不其御六罰既侵六極其下。○師古曰周書鴻範之辭饗當也言所行當於天心則降以五福若所爲不善則以六極畏罰之

案尚書釋文云嚮許亮切一音許兩反段玉裁曰嚮當作鄉經典向背字祇作鄉絕少作嚮嚮字雖見於漢碑然其字上下二體皆諧聲也疑漢之俗字僞孔傳云天所以嚮勸人用五福義取歸向釋文云許亮切故知其字必本作鄉也釋文又云一音許兩反者按漢書谷永傳引經曰饗用五福字作饗此許兩反之證五行志引經曰次九曰嚮然則志文本同谷永傳作饗也喬樅謂師古釋饗字爲當此必漢書音義舊注語而師古襲用之漢人皆習今文尚書饗當之訓蓋三家尚書章句之異義也

續漢書五行志注引續漢書建武二年尹敏上疏曰六沴作見若是供御帝用不差神則大喜五福乃降用章于下若不供御六罰既侵六極其下明供御則天報之福不供御則禍災至欲尊六事之體則貌言視聽思心之用合六事之揆以致乎太平而消除轆軻孽害也

魏志高堂隆傳書曰天聰明自我民聰明天明畏自我民明威輿人作頌則嚮以五福民怒吁嗟則威以六極言天之賞

罰隨民言順民心也是以臨政務在安民為先然後稽古之  
化格于上下自古及今未嘗不然也

皇清經解續編卷千九十五終  
太倉畢長慶校  
新陽汪之昌

皇清經解續編卷千九十六

南菁書院

水今文尙書經說攷十四

中 侯官陳喬樞撰

周書六

鴻範第六十六

今文尙書十一

五行一曰水二曰火三曰木四曰金五曰土

史記宋世家五行一曰水二曰火三曰木四曰金五曰土

集解鄭元曰此數本諸陰陽所生之次也

漢書五行志經曰初一日五行五行一曰水二曰火三曰木

四曰金五曰土

案史記全載洪範篇此五行及下五事八政五紀皇極三

德稽疑庶徵五福等字上並無一二以至八九等字漢書  
五行志載洪範文五行上無一字五事上無二字食貨志  
載洪範文八政上無三字又谷永傳引此篇皇極皇建其  
有極皇極上亦無五字說文解字引書云卞疑亦無七字  
洪适隸釋載熹平石經尚書殘碑洪範篇有爲天下王三  
正德一曰正直三德上無六字可見尚書今文古文皆無此  
等數目之字僞孔本乃各妄增一二至八九等字是亂經  
亂文也宜從刪削

尚書大傳曰大水小水東流歸海非水無以準萬物之平非  
水無以通遠道任重也  
又曰火發於密水洩於深

案記纂淵海卷一水火引尚書大傳文如此先大夫曰韓  
王昌黎外集擇言解有水洩於密水發於深一語蓋本書大  
傳傳正得言曰水火引尚書大傳文如此先大夫曰韓  
白虎通五行篇五行者何謂也謂金木水火土也言行者欲  
言爲天行氣之義也尚書一曰水二曰火三曰木四曰金五  
曰土水位在北方北方者陽氣在黃泉之下任養萬物水之  
爲言準也言養物平均有準則也木在東方東方者陽氣始  
動萬物始生木之爲言觸也陽氣動躍觸地而出也火在南  
方南方者陽在上萬物垂枝火之爲言委隨也言萬物布施  
火之爲言化也陽氣用事萬物變化也金在西方西方者陰  
始起萬物禁止金之爲言禁也言秋時萬物陰氣所禁止也

土在中央者主吐含萬物生之爲言吐也噓土居中總吐萬物也  
又曰五行所以更王何以其轉相生故有終始也木生水水生土土生金金生水水生木是以木旺火相旺死陰囚水休王所勝者死囚故王者林木王所以老十二月何注王四季各十八日合九十日爲一時王九十月土所以王四季何木非土不生火非土不榮金非土不成水非土不存土扶微助衰歷成其道故五行更王亦須土也王四季居中決不名時行有五時有四何四時爲時五行爲節故木王卽謂之春金玉卽謂之秋土尊不任職君不居部故時有四也蓋本書大按禮記月令正義引洪範五行一曰水去去所以一曰水天者乾貞於十月子土書月一陽生故水數一二曰火者坤貞於六月未六月兩陰生陰不敢當午也三曰木者正月三陽生是建寅之月故次木四曰金者八月四陰生是建酉之月故次金五曰土者三月五陽生三月建辰之月辰爲土土王四季藏四行又廣大故次土也是亦言陰陽所生之次與鴻範合

又曰五行所以二陽三陰何土尊尊者配天金木水火陰陽自偶

荀悅孝惠皇帝紀一曰水二曰火三曰木四曰金五曰土劉熙釋名釋天曰五行者五氣也於其方各施行也金禁也其氣剛嚴能禁制也木冒也華葉自覆冒也水準也準平物

也火化也消化物也亦言毀也物入中皆毀壞也土吐也能吐生萬物也

水曰潤下火曰炎上木曰曲直金曰從革土曰稼穡

史記宋世家水曰潤下火曰炎上木曰曲直金曰從革土曰稼穡○集解馬融云金之性從火而更可銷鑠○王肅曰種之曰稼斂之曰穡

土爰稼穡

漢書五行志水曰潤下火曰炎上木曰曲直金曰從革土爰

稼穡○張晏曰革更也可更銷鑠也

又李尋傳尋對災異曰書云水曰潤下陰動而卑不失其道天下有道則河出圖洛出書

按李尋事張山拊受小夏侯尚書由是小夏侯有李氏之

學今據尋說水曰潤下與白虎通誼同是為白虎通義皆

土用今尚書說之確證

白虎通五行篇五行之性或上或下何火者陽也尊故上水

者陰也卑故下木者少陽金者少陰有中和之性故可曲可

直從革土者最大苞含物之將生者出者將歸者不嫌清濁

為萬物主尚書曰水曰潤下火曰炎上木曰曲直金曰從革

土爰稼穡

案尚書正義引王肅曰水之性潤萬物而退下火之性盛

而升上王注與白虎通誼亦各易睽彖傳曰火動而上澤

動而下虞翻注亦引此經以為之說是古文今文訓誼並

同正義又言上文水火木金有本性其稼穡以人事爲名  
非土本性變曰言爰以見此異也六府以土穀爲二由其  
體異故也喬樅攷史記宋世家載此經土曰稼穡不作爰  
土字按爾雅釋詁云粵於爰曰也曰爰訓同竝無異義孔冲  
遠強爲之解其說近泥然則史記作曰蓋據歐陽尙書王  
充習歐陽之學者故與司馬子長所述文同此亦三家之  
管本有不同也木音少則金音少則其申味之對姑可曲回  
荀悅孝惠皇帝紀水曰潤下火曰炎上木曰曲直金曰從革  
土爰稼穡待讀之辭讀可更讀  
潤下作鹹炎上作苦曲直作酸從革作辛稼穡作甘宋書  
史記宋世家潤下作鹹炎上作苦曲直作酸從革作辛稼穡

作甘

白虎通五行篇水味所以鹹何是其性也所以北方鹹者冬  
主萬物固藏鹹者所以堅之也猶五味得鹹乃堅也木味所  
以酸者何東方萬物之發生也酸者所以達生也猶五味得  
酸乃達也火味所以苦何南方主長養苦者所以長養也猶  
五味須苦可以養也金味所以辛何西方煞傷成物辛所以  
煞傷之也猶五味得辛乃委煞也土性所以甘何中央者中  
和也故甘猶五味以甘爲主也尙書曰潤下作鹹炎上作苦  
曲直作酸從革作辛稼穡作甘論語  
案高誘注呂覽孟春紀云酸者鑽也萬物應陽鑽地而出  
卽酸所以達生之誼高誘亦用今文尙書說故解詁與白

虎通合

尚書大傳曰水火者百姓之所飲食也金木者百姓之所興作也土者萬物之所資生也是爲人用

案尚書正義云此章所演凡有三重第一言其名次第三言其體性第三言其氣味言五者各爲人用引書傳云云正爲證五行卽五材左氏襄二十七年傳云天生五材民並用之謂之行者在天爲五氣流行在地爲世所行用也論衡驗符篇曰稼穡作甘土也論衡論衡五行論漢書五行志曰河圖雜書相爲經緯八卦九章相爲表裏昔殷道弛文王演周易周道敝孔子述春秋則乾坤之陰陽效洪範之咎徵天人之道粲然著矣

案五行志又云漢興承秦滅學之後景武之世董仲舒治

公羊春秋始推陰陽爲儒者宗宣元之後劉向治穀梁春

秋數其旤福傳以洪範

師古云以洪範義傳而說之傳字或作傳讀曰附謂附著也與

仲舒錯至向子歆治左氏傳其春秋意亦已乖矣言五行

傳又頗不同是以攬仲舒別向歆傳載睦孟夏侯勝京房

谷永李尋之徒所陳行事訖於王莽舉十二世以傳春秋

著於篇據班氏云云則志所載多述洪範五行傳之文攷

藝文志有劉向五行傳記十一卷許商五行傳記一篇皆

尚書今文家言也惟歆兼治古文尚書然觀班氏云劉向

洪範論發明大傳著天人之應又云孝武時夏侯始昌通

五經善推五行傳以傳族子夏侯勝下及許商皆以教所

賢弟子其傳與劉向同惟歆傳獨異是孟堅於歆有微詞故志中歆五行傳別爲一說於古文今文兩家言分析甚明先大夫輯尙書大傳定本附載漢書五行志綴以它書所引劉氏五行傳論其書已別刊行喬樞今於洪範篇僅載伏生大傳洪範傳文其餘各家傳記文多故不具錄云漢書劉向傳向見尙書洪範箕子爲武王陳五行陰陽休咎之應向乃集合上古以來歷春秋六國至秦漢符瑞災異之記推迹行事連傳禍福著其占驗比類相從各有條目凡十

一篇號曰鴻範五行傳論奏之

劉向傳贊曰劉氏鴻範論發明大傳著天人之應

漢書五行志傳曰田獵不宿飲食不享出入不節奪民農時及有姦謀則木不曲直○服虔曰不宿不得其時也或曰不豫戒曰不宿不戒以其時也○李奇曰姦謀增賦履畝之事也○臣瓚曰姦謂邪謀也○師古曰姦謀卽下所謂作爲姦詐以奪農時李說是也不享不行享獻之禮也

說曰木東方也於易地上之木爲觀其於王事威儀容貌亦可觀者也故行步有佩玉之度登車有和鸞之節田狩有三驅之制飲食有享獻之禮出入有名使民以時務在勸農桑謀在安百姓如此則木得其性矣若迺田獵馳騁不反宮室飲食沈湎不顧法度妄興繇役曰奪民時作爲姦詐曰傷民財則木失其性矣蓋工匠之爲輪矢者多傷敗及木爲變怪是爲木不曲直○如淳曰揉輪不曲揉矢不直也○臣瓚曰

木爲變怪梓柱更生及變爲人形是也

案志引傳曰者伏生尙書大傳四十一篇中洪範五行傳  
之文也稱說曰者當是歐陽夏侯等之說所以申釋五行  
篇傳者攷漢書藝文志載尙書歐陽章句三十一卷大小夏  
夏侯章句各二十九卷大小夏侯解詁二十九篇歐陽說義  
二篇豈志所稱說曰卽歐陽說義二篇之語與  
後漢書東平王蒼傳蒼上書曰臣聞時令盛春農事不聚興  
功傳曰田獵不宿飲食不享出入不節則木不曲直此失春  
令者也

續漢書五行志五行傳曰田獵不宿飲食不享出入不節奪  
民農時及有姦謀則木不曲直謂木失其性而爲災也○劉

昭注補鄭元曰不宿不宿禽也角主天兵周禮四時習兵因  
以田獵禮志曰天子不合圍諸侯不掩羣過此則暴天物爲  
不宿禽角南有天庫將軍騎官享獻也禮志曰天子無事則  
歲三田一爲乾豆二爲賓客三爲充君之庖周禮獸人冬獻  
狼夏獻麋春秋獻獸物此獻禮之大略也角爲天門房有三  
道出入之象也房心農時之候也季冬之月命農師耦耕事  
是時房心晨中春秋傳曰辰爲農祥后稷之所經緯也亢爲  
朝廷房心爲明堂謀事出政之象君行此五者爲逆天東宮  
之政東宮於地爲木木性或曲或直人所用爲器者也無故  
生不暢茂多有折傷是木不曲直木金水火土謂之五材春  
秋傳曰天生五材民並用之其政逆則神怒神怒則材失性

不爲民用其他變異皆屬沴沴亦神怒凡神怒者日月五星  
既見適於天矣

案司馬彪續漢志云五行傳說及其占應漢書五行志錄  
之詳矣故泰山太守應劭給事中董巴散騎常侍譙周並  
撰建武以來災異今合而論之呂續前志云則其義皆東  
漢經師舊說亦今文家尚書之學也梁劉昭注補云注五  
行稱鄭元曰皆出注大傳也鄭注尚書大傳本久已亡失  
今故全載之以補傳注之逸焉

南齊書五行志木傳曰東方易經地上之木爲觀故木於人  
威儀容貌也木者春生氣之始農之本也無奪農時使民歲  
不過三日行什一之稅無貪欲之謀則木氣從如人君失威  
儀逆木行田獵馳騁不反宮室飲食沈湎不顧禮制出入無  
度多發徭役以奪民時作爲姦詐以奪民財則木失其性矣  
蓋以工匠之爲輪矢者多傷敗故曰木不曲直

隋書五行志五行傳曰木者東方威儀容貌也古者聖王垂  
則天子穆穆諸侯皇皇登車則有鸞和之節田狩則有三驅  
之制飲食則有享獻之禮出入有名使民以時無事不出境  
此容貌動作之得節所以順木氣也如人君違時令失威儀  
田獵馳騁不反宮室飲食沈湎不顧法度縱欲恣睢出入無  
度多徭役以奪人時增賦稅以奪人財則木不曲直

蕭吉五行大義洪範傳曰東方易云地上之木爲觀言春時  
出地之木無不曲直花葉可觀如人威儀容貌也

春秋繁露五行順逆篇曰木者春生之性農之本也勸農事  
無奪民時使民歲不過三日行什一之稅進經術之士誕羣  
禁出輕繫去稽留除桎梏開閉闔通障塞恩及草木則樹木  
華而諸草生恩及鱗蟲則魚大爲鱸鯨不見羣龍下如人君  
出入不時走狗試馬馳騁不反宮室好姪樂飲酒沈湎縱恣  
不顧政治事多發役以奪民時作謀增端以奪民財民病疥  
搔溫體足胗痛咎及於木則茂木枯槁工匠之輪多傷敗毒  
水滄羣漉陂咎及魚蟲則魚不爲羣龍深藏鯨出見

案董子此篇與洪範五行傳及說大指相同攷史記儒林  
傳言漢定伏生求其書亡數十篇獨得二十九篇卽以教  
於齊魯之間學者由是頗能言尙書諸山東大師無不涉

言尙書以教矣漢書儒林傳亦云然董子生於漢初爲世大  
儒於尙書之學自必精通漢書五行志亦云監仲舒著于  
論篇是班氏已引取其說今故採其書論五行者列於伏生  
傳大傳後以資參觀而互證焉

漢書五行志傳曰棄法律逐功臣殺太子呂妾爲妻則火不  
炎上

說曰火南方揚光輝爲明者也其於王者南面鄉明而治書  
云知人則愆能官人故堯舜舉羣賢而命之朝遠四佞而放  
諸壑孔子曰浸潤之譖膚受之訴不行焉可謂明矣賢佞分  
別官人有序帥由舊章敬重功勳殊別適庶如此則火得其  
性矣若迺信道不篤或耀虛僞讒夫昌邪勝正則火失其性

矣自上而降及濫炎妄起災宗廟燒宮館雖興師眾勿能救  
也是謂火不炎上○師古曰書虞書咎繇謨之辭愆智也能  
知其材則能官之所以爲智也四佞卽四凶也遠離也堊古  
野字適讀曰嫡炎讀曰燄無燄燄讀曰燄無燄燄讀曰燄無燄燄讀曰燄無燄  
續漢書五行志五行傳曰棄法律逐功臣殺太子以妾爲妻  
則火不炎上謂火失其性而爲災也○注鄭元曰東井主法  
令也功臣制法律者也或曰喙主尙食七星主衣裳張爲食  
廚翼主天倡經曰臣作朕股肱耳目予欲左右有民女翼予  
欲觀古人之象日月星辰山龍華蟲作續宗彝藻火粉米黼  
黻絺繡以五采章施於五色作服女明予欲聞六律五聲八  
音在治習以出納五言女聽是則食與服樂臣之所用爲大  
功也七星北有酒旗南有天廚翼南有器府五行火生土天  
文以參繼東井四時以秋代夏殺太子之象也春秋傳曰夫  
干乘之主將廢正而立不正必殺正也軒轅爲后妃屬南宮  
其大星女主之位女御在前妾爲妻之象也君行此四者爲  
逆天南宮之政南宮於地爲火火性炎然上行人所用爲享  
飪者也無故因見作熱燔熾爲害是爲火不炎上其他變異  
皆屬診也

案劉昭注補於火不炎上句引春秋考異郵曰火者陽之  
精也人合天氣五行陰陽極陰反陽極陽反陰故應人行  
以災不祥在所以感之萌應轉旋從逆殊心也其說亦可

互證

隋志鴻範五行傳曰火者南方陽光爲明也人君向南蓋取象也昔者聖帝明王負宸攝袂南面而聽斷天下攬海內之雄俊積之於朝以續聰明推邪佞之僞臣投之於野以通壅塞以順火氣不明之君惑於讒口白黑雜揉代相是非眾邪竝進人君疑惑棄法律閒骨肉殺太子逐功臣以孽代宗則火失其性始因長平焚歟爲害最烈火不炎土其出變異南齊志曰火南方揚光輝出炎燭爲明者也人君向明而治蓋取其象以知人爲分讒佞既遠羣賢在位則爲明而火氣從矣人君疑惑棄法律不誅讒邪則讒口行內閒骨肉外疎忠臣至殺世子逐功臣以妾爲妻則火失其性上灾宗廟下灾府樹內燬本朝外燬觀闕雖興師眾不能救也

案南齊志雖不標所出然其詞與五行傳同此蓋亦鴻範訓傳之文也以下三節竝同

春秋繁露五行順逆篇火者夏成長本朝也舉賢良進茂才官得其能任得其力賞有功封有德出貨財賑困乏正封疆使四方恩及於火則火順人而甘露降恩及羽蟲則飛鳥大爲黃鵠出見鳳凰翔如人君惑於讒邪內離骨肉外疎忠臣至殺世子誅殺不辜逐忠臣以妾爲妻棄法令婦妾爲政賜予不當則民病血壅腫目不明咎及於火則大旱必有火裁摘巢探鷄咎及羽蟲則蜚鳥不爲冬應不來梟鶚羣鳴鳳凰高翔

漢書五行志傳曰治宮室飾臺榭內淫亂犯親戚侮父兄則

稼穡不成

說曰土中央生萬物者也其於王者爲內事宮室夫婦親屬亦相生者也古者天子諸侯宮廟大小高卑有制后夫人媵妾多少進退有度九族親屬長幼有序孔子曰禮與其奢也寧儉故禹卑宮室文王刑於寡妻此聖人之所以昭教化也如此則土得其性矣若迺奢淫驕慢則土失其性亡水旱之災而草木百穀不熟是爲稼穡不成

續漢書五行志五行傳曰治宮室飾臺榭內淫亂犯親戚侮父兄則稼穡不成謂土失其性而爲災也

隋志鴻範五行傳曰土者中央爲內事宮室臺榭夫婦親屬也古者自天子至於士宮室寢居大小有差高卑異等骨肉有恩故明王賢君修宮室之制謹夫婦之別加親戚之恩敬父兄之禮則中氣和人君肆心縱意大爲宮室高爲臺榭雕文刻鏤以疲人力淫佚無別妻妾過度犯親戚侮父兄中氣亂稼穡不成

蕭吉五行大義曰五行傳及白虎通皆云木非土不生根莖茂榮火非土不榮得木著形金非土不成入範成名水非土不停隄防禁盈土扶微助衰應成其道故五行更互須土土王四季而居中央不以名成時故知同時俱起但託義相生春秋繁露五行順逆篇土者夏中成熟百種君之官循宮室之制謹夫婦之別加親戚之恩恩及土則五穀成而嘉禾興恩及倮蟲則百姓親附城郭充實賢君皆遷仙人降如人君

好姪佚妻妾過度犯親戚侮父兄欺罔百姓大爲臺榭五色成光雕文刻鏤則民病心腹宛黃舌爛病咎及於土則五穀不成暴虐妄誅咎及倮蟲倮蟲不爲百姓叛去賢聖放亡漢書五行志傳曰好戰攻輕百姓飾城郭侵邊境則金不從革  
說曰金西方萬物既成殺氣之始也故立秋而鷹隼擊秋分而微霜降其於王事出軍行師把旄杖鉞警士眾抗威武所以征畔逆止暴亂也詩云有虔秉鉞如火烈烈又曰載戢干戈載櫜弓矢動靜應誼說以犯難民忘其死金得其性矣若迺貪欲恣睢務立威勝不重民命則金失其性矣蓋工冶鑄金鐵金鐵冰滯涸堅不成者眾及爲變怪是爲金不從革○

師古曰涸讀與洄同洄凝也

續漢書五行志五行傳曰好攻戰輕百姓飾城郭侵邊竟則金不從革謂金失其性而爲災也○注鄭元曰參伐爲武爲攻戰之象輕之者不重民命春秋傳曰師出不正反戰不正勝也昴畢閒爲天街甘氏經曰天街保塞孔途道衢保塞城郭之象也月令曰四鄙入保畢主邊兵君行此四者爲逆天西宮之政西宮於地爲金金性革從形而革入所用爲器者也無故治之不銷或入火飛亡或鑄之裂形是爲不從革其變異皆屬沴也  
隋志鴻範五行傳曰金者西方萬物既成殺氣之始也古之王者興師動眾建立旗鼓以誅殘賊禁暴虐安天下殺伐必

應義以順金氣如人君樂侵陵好攻戰貪城邑之賂以輕百姓之命人皆不安外內騷動則金不從革漢書五行志曰金不從革則國有亂南齊志曰金者西方萬物既成殺氣之始也其於五事兵戎戰伐之道也王者興師動眾建立旗鼓仗旄把鉞以誅殘賊正止暴亂殺伐應義則金氣從工冶鑄化革成器也人君樂侵陵好攻戰貪城邑輕百姓之命人民不安內外騷動則金失其性蓋冶鑄不化冰滯澗堅故曰金不從革又曰維木沴

金

春秋繁露五行順逆篇金者秋殺氣之始也建立旗鼓把仗旄鉞以誅殘賊禁暴虐安天下故動眾興師必應義理由則祠兵入則振旅以咸習之因於蒐狩存不忘亡安不忘危修

城郭繕墻垣審羣禁飭兵甲警百官誅不法恩及於金石則涼風出恩及於毛蟲則走獸大爲麒麟至如人君好戰侵陵諸侯貪城邑之賂輕百姓之命則民病喉咳嗽筋攣鼻仇塞咎及於金則鑄化凝滯凍堅不成四面張罔焚林而獵咎及毛蟲則走獸不爲白虎妄搏麒麟遠去漢書五行志曰麒麟爲宗廟漢書五行志傳曰簡宗廟不禱祠廢祭祀逆天時則水不潤

下

說曰水北方終臧萬物者也其於人道命終而形臧精神放越聖人爲之宗廟呂收魂氣春秋祭祀曰終孝道王者卽位必郊祀天地禱祈神祇望秩山川懷柔百神亡不宗事慎其齊戒致其嚴敬鬼神歆饗多獲福助此聖王所以順事陰氣

和神人也至發號施令亦奉天時十二月咸得其氣則陰陽調而終始成如此則水得其性矣若迺不敬鬼神致令逆時則水失其性霧水暴出百川逆溢壞鄉邑溺人民及淫雨傷稼穡是爲水不潤下○師古曰懷來也柔安也謂招來而祭祀之使其安也宗尊也

續漢書五行志五行傳曰簡宗廟不禱祠廢祭祀逆天時則水不潤下謂水失其性而爲災也○注鄭元曰虛危爲宗廟牽牛主祭祀之牲日在星紀周以爲正在元枵殷以爲正皆不得四時之正逆天時之象也春秋定十五年夏五月辛亥郊譏連卜三正以至失時是其類也君行此四者爲逆天北宮之政也北宮於地爲水水性潤下流人所用灌溉者也無

故源流竭絕川澤以涸是爲水不潤下其他變異皆屬沴也隋志鴻範傳曰水者北方之藏氣至陰也宗廟者祭祀之象也故天子親耕以供粢盛皇后親蠶以供祭服敬之至也發號施令十二月咸得其氣則水氣順如人君簡宗廟不禱祀逆天時則水不潤下南齊志曰水北方冬藏萬物氣至陰也宗廟祭祀之象死者精神放越不反故爲之廟以收其散爲之貌以收其魂神而孝子得盡禮焉敬之至則神歆之此則至陰之氣從則水氣從溝瀆隨而流去不爲民害矣人君不禱祠簡宗廟廢祭祀逆天時則霧水暴出川水逆溢壞邑軼鄉沈溺民人故曰水不潤下

尚書大傳曰王者躬耕所以供粢盛

尚書大傳又曰古者天子諸侯必有公桑蠶室就川而爲之築官有三尺棘墻而外閉之大昕之朝三宮之夫人沐種於川世婦卒蠶獻繭於夫人纁三盆手○注云官當爲宮雉長三丈高一丈度長以長度高以高則蠶宮高一丈禮志曰仞有三尺七尺曰仞大昕季春朔日之朝也獻繭於夫人此諸侯之禮天子則獻繭於后手猶親也言后夫人親以手總之

也案有三尺之上脫去仞字宜補

春秋繁露五行順逆篇水者冬藏至陰也宗廟祭祀之始敬四時之祭禘祫昭穆之序天子祭天諸侯祭土閉門闔大搜索斷刑罰執當罪飭關梁禁外徒恩及於水則醴泉出恩及

介蟲則鼃鼃大爲靈龜出如人君簡宗廟不禱祠廢祭祀執法不順逆天時則民病流腫水脹痿痺孔竅不通咎及於水霧氣冥冥必有大水水爲民害咎及介蟲則龜深藏鼃鼃鳴春秋繁露五行相生篇天地之氣合而爲一分爲陰陽判爲四時列爲五行行者行也其行不同故謂之五行五行者五官也比相生而閒相勝也故謂治逆之則亂順之則法

又曰東方者木農之本司農尙仁進經術之士道之以帝王之路將順其美匡救其惡執規而生至溫潤不知地形肥饒美惡立事生則因地之宜召公是也親入南畝之中觀民墾草發淄耕種五穀積蓄有餘家給人足倉庫充實司馬食谷司馬本朝也本朝者火也故曰木生火

又曰南方者火也本朝司馬尚智進賢聖之士上知天文其形兆未見其萌芽未生昭然獨見存亡之機得失之要治亂之源豫禁未然之前執矩而長至忠厚仁輔翼其君周公是也成王幼弱周公相誅管叔蔡叔以定天下天下既甯以安君官者司營司營者土也故曰火生土

又曰中央土者君官也司營尚信卑身賤體夙興夜寐稱述往古以厲主意明見成敗微諫納善防滅其惡絕源塞隙執繩而制四方至忠厚以信其君據義割恩太公是也應天因時之化威武強禦以成大理者司徒也司徒者金也故曰土生金

又曰西方者金大理司徒也司徒尚義臣死君而眾人死父親有尊卑位有上下各死其事事不踰矩執權而伐兵不苟克取不苟得義而後行至廉而威質直剛毅子昂是也伐有罪討不義是以百姓附親邊境安甯寇賊不發邑無訟獄則親安執法者司寇也司寇者水也故曰金生水

又曰北方者水執法司寇也司寇尚禮君臣有位長幼有序朝廷有爵鄉黨以齒升降揖讓般伏拜謁折旋中矩立而磬折拱則抱鼓執衡而藏至清廉平賂遺不受請謁不聽據法聽訟無所有阿孔子是也爲魯司寇斷獄屯屯與眾共之不  
敢自專是死者不恨生者不怨百工維時以成器械器械既成以給司農司農者田官也田官者木故曰水生木

春秋繁露五行相勝篇木者司農也司農爲姦朋黨比周以

蔽主明退匿賢士絕滅公卿教民奢侈賓客交通不勸田事

博戲鬪雞走狗弄馬長幼無禮大小相虜竝為寇賊橫恣絕

理司徒誅之齊相是也行霸任兵侵蔡蔡潰木者君之官也

夫木者農也農者民也不順如叛則命司徒誅其不率正矣

故曰金勝木案如而古書通用誅其不率正誅其不率正

又曰火者司馬也司馬為讒反言易辭以譖愬人內離骨肉

之親外疎忠臣賢聖旋亡讒邪日昌魯上大夫季孫是也專

息惡譖愬其羣臣劫惑其君孔子為魯司寇夫火者本朝有

邪讒熒惑其君執法誅之執法者水也故曰水勝火案坊本

者土也故土者君之官也字既譌誤又并下節土者君之官

也為一是五行相勝少水勝火之文矣顯係轉寫譌脫今為

又曰土者君之官也其相司營為神主所為皆曰可主所言

皆曰善謂順主指聽從為比進主所善以快主意導主以邪

陷主不義大為宮室多為臺榭彫文刻鏤五色成光賦斂無

度以奪民財多發徭役以奪民時作事無極以奪民力百姓

愁苦叛去其國楚靈王是也作乾谿之臺三年夫土者君之

官也君大奢侈過度失禮民叛矣其民叛其君窮矣故曰木

勝土

又曰金者司徒也司徒為賊內得於君外驕軍士專權擅勢

誅殺無罪侵伐暴虐攻戰妄取令不行禁不止將率不親士

卒不使兵弱地削令君有恥則司馬誅之楚殺其司徒得臣

敵內得於君驕蹇不卹其下卒不為金者司徒司徒弱不能

使當敵而弱以危楚國司馬誅之今文尚書經說攷十四中

使士眾則司馬誅之故曰火勝金

金者兵也故曰誅不誅

又曰水者司寇也司寇為亂足恭小謹巧言令色聽謁受賂

阿黨不平慢令急誅誅殺無罪則司營誅之

營蕩是也為齊司寇太公封於

齊問蕩以治國之要營蕩對曰任仁義而已太公曰任仁義奈何營蕩對曰仁者愛人者有子不食其力尊老者妻長而

夫拜之太公曰寡人欲以仁義治齊今子以仁義亂齊寡人立而誅之以定齊國

夫水者執法司寇

也執法附黨不平依法刑人則司營誅之故曰土勝水

春秋繁露治水五行篇曰日冬至七十二日木用事其氣燥

濁而青七十二日火用事其氣慘陽而赤七十二日土用事

其氣溫濁而黃七十二日金用事其氣慘淡而白七十二日

水用事其氣清塞而黑七十二日復得木木用事則行柔惠

誕羣禁至于立春出輕繫去稽留除桎梏開閉闔通障塞存

幼孤矜寡獨無伐木火用事則正封疆循田疇至于立夏舉

賢良封有德賞有功出使四方無縱水土用事則養長老存

幼孤矜寡獨賜孝悌施恩澤無與土功金用事則修城郭繕

墻垣審羣禁飭甲兵警百官誅不法存長老無焚金石水用

事則閉門閭大搜索斷刑罰執當罪飭關梁禁外徙無決池

隄

春秋繁露治亂五行篇火干木蟄蟲蚤出蛟雷蚤行禁土干

木胎天卯蝦鳥蟲多傷正金干木有兵之水干木春不霜

土干火則多雷金干火草木夷水干火夏雹木干火

則地動干金干土則五穀傷有殃隕冰干土夏寒雨霜木

干土保蟲不為土火干土則大旱木水干金則魚不為木

千金則草木再生火千金則草木秋榮金生水金五穀不成  
成則木干水冬蟄不藏土干水則蟄蟲冬出水干火則  
星墜火金干水則冬天寒草木凍水干火則木干火  
春秋繁露五行變救篇五行變至當救之以德施之天  
不則咎除不救以德不出三年天雷雨石木有變春凋  
秋榮秋木冰春多雨此繇役眾賦斂重百姓貧窮叛去道  
多饑人救之者省繇役薄賦斂出倉穀賑困窮矣火有變  
冬溫夏寒此王者不明善者不賞惡者不紕不肖在位  
賢者伏匿則寒暑失序而民疾疫救之者舉賢良賞有  
功封有德土有變大風至五穀傷此不信仁賢不敬父  
兄淫佚無度宮室多營救之者省宮室去雕文舉孝弟恤  
黎元金有變畢昴爲回三覆有武多兵多盜寇此棄義貪  
財輕民命重貨賂百姓趨利多姦軌救之者舉廉潔立正  
直隱武行文束甲械水有變冬溼多霧春夏雨雹此法令  
緩刑罰不行救之者憂囹圄究姦宄誅有罪蒐五日

五事一曰貌二曰言三曰視四曰聽五曰思貌曰恭言曰從  
視曰明聽曰聰思曰睿恭作肅從作艾明作哲聰作謀睿作  
聖史記宋世家五事一曰貌二曰言三曰視四曰聽五曰思  
貌曰恭視曰明聽曰聰思曰睿恭作肅從作治明作智聰作  
謀睿作聖○集解馬融曰發言當使可從出令而從所以爲  
治也睿通也上聰則下進其謀

案古文尙書作五曰思思曰睿睿作聖今文尙書作五曰

思心思心曰容容作聖宋世家載鴻範篇與古文尙書同疑卽孟堅所謂多從孔安國問用古文說者然史記漢書每遭俗人妄改今姑仍之辨詳見後按段玉裁曰如五是來備四字今本改爲曰時五者來備六字揆其所以蓋裴駙集解用孔安國注五者各以時之語則淺人增曰時二字固無足怪此處集解亦用馬融注睿通也孔安國注於事無不通謂之聖則正文改容作睿亦無足怪且或裴駙前已有改之今本史記未可盡信也

尙書大傳曰心之精神是謂聖

案此句見孔子集語卷下及釋史八十六蓋卽釋洪範思心曰容容作聖之訓也

思曰睿

容作聖

漢書五行志經曰羞用五事五事一曰貌二曰言三曰視四曰聽五曰思貌曰恭言曰從視曰明聽曰聰思曰睿恭作肅從作艾明作哲聰作謀容作聖○應劭曰容通也上聰則下謀故聰爲謀也○張晏曰容通達以至於聖

案說文容在谷部云深通川也睿在叡部通也小篆作叡古文作睿是容與睿截然兩字矣集韻十三祭云叡古文作睿睿以睿睿爲一字殊誤辨詳見後今本漢書作五曰思思曰容容作聖疑亦出後人所改也

又案尙書正義曰此章所演亦爲三重第一言其所名第一言其所用第三言其所致鄭云此數本諸陰陽昭明人

相見之次也恭明聰睿行之於我身其從則是彼人從我似與上下違者我是而彼從亦我所爲不乖刺也皆謂其政所致也君貌恭則臣禮肅君言從則臣職治君視明則臣昭晰君聽聰則臣進謀君思睿則臣賢智鄭意謂此所致皆是君致臣也案庶徵之意休咎皆肅又所致若肅又明聰皆是臣事則休咎所致皆不由君何不然之甚乎喬縱謂洪範五事雖據人君爲說要當君臣各敬用其事觀鄭君尚書大傳注其誼自明但不必以恭肅等分屬君臣反致費解鄭注尚書云云據古文家說也其注大傳云云用今文家說也義實亦互相備耳觀馬融注尚書解聰作思曰謀云上聰則下進其謀應劭注漢書亦云上聰則下謀故曰聰作謀與馬鄭解合蓋東漢之末古文尚書已顯於世通儒多涉獵之故應劭時亦兼採古文尚書說也

漢書天文志歲星曰東方春木於人五常仁也五事貌也仁虧貌失逆春令傷木氣罰見歲星○晉灼曰太歲在四仲則歲行三宿太歲在四孟四季則歲行二宿二八十六三四十二而行二十八宿十二歲而周天

熒惑曰南方夏火禮也視也禮虧視失逆夏令傷火氣罰見熒惑○晉灼曰常以十月入太微受制而出行列宿司無道出入無常也

太白曰西方秋金義也言也義虧言失逆秋令傷金氣罰見太白○晉灼曰常以正月甲寅與熒惑晨出東方二百四十

日而入四十日又出西方二百四十日而入三十五日而復出東方出以寅戌入以丑未也

辰星曰北方冬水知也聽也知虧聽失逆冬令傷水氣罰見星辰○晉灼曰常以二月春分見奎婁五月夏至見東井八月秋分見角亢十一月冬至見牽牛出以辰戌入以丑未二旬而入晨候之東方夕候之西方也

填星曰中央季夏土信也思心也仁義禮智曰信爲主貌言視聽以心爲正故四星皆失填星迺爲之動○晉灼曰常以甲辰元始建斗之歲填行一宿二十八歲而周天也

案五常所屬漢書天文志以智屬水信屬土禮記中庸鄭注言木神則仁金神則義火神則禮水神則信土神則智

說各不同毛公及京房等皆以土爲信水爲智與天文志合攷易乾鑿度云孔子曰八卦之序成立則五氣變形故大生而應八卦之體得五氣以爲五常仁義禮信智是也萬物始出於震震東方之卦也陽氣始生受形之道也故東方爲仁成於離離南方之卦也陽得正於上陰得正於下尊卑之象定禮之序也故南方爲禮入於兌兌西方之卦也陰用事而萬物得其宜義之理也故西方爲義漸於坎坎北方之卦也陰氣形盛陽氣含閉信之類也故北方爲信四方之義皆統於中央故乾坤艮巽位在四維中央所以繩四方行也智之決也故中央爲智道興於仁立於禮理於義定於信成於智五者道德之分也天人之際也

聖人所以通天意理人倫而明至道也而乾坤鑿度則云  
 運五行先水次木次火次土及金木仁火禮土信水智金  
 義又云坤元有信坤道有閉亦兩說兼載者蓋土總四行  
 居時之季辰之數五得土之生氣五行大義云寅為陽始  
 申為陰始自辰數至申  
 數五自戌數至寅數亦五也揚子太元云子午之數九丑  
 未八寅申七卯酉六辰戌五巳亥四十二辰中惟辰戌皆  
 五得土之數辰又水之所歸也故土為信為智兼二誼也白虎  
 通曰脾所以信何脾者土之精也土尚任養萬物為之象  
 生物無私信之至也故脾象土色黃也口為之候何口能  
 啖嘗舌能知味亦能出音聲吐滋液故元命包曰口者脾  
 之門戶脾者土之精土為北斗主變化者也言口為之候  
 是信之誼也言土主變化是智之誼也易是類謀曰乾建

度坤拒謀注云坤為土土性智故謀屬焉水亦得兼二誼  
 者五藏配以六府水府有三膀胱者水之府三焦者亦水  
 之府也水所以有二府者水屬陰陰數偶也五藏之中腎  
 藏有雙亦其象也孔子曰智者樂水則智屬水矣素問曰  
 腎者作強之官伎巧出焉巧即智之誼孟子曰智譬則巧  
 也是其明證易乾坤鑿度曰水為天地信順氣而潮潮者  
 水氣水氣來往行險而不失其信者也漢書翼奉傳注載  
 晉灼引翼氏五性云脾性力力行信戊癸主之戊土也癸  
 水也揚子太元云甲己之數九乙庚八丙辛七丁壬六戊  
 癸五五者土之數也而癸得之故信可知古訓如是後之  
 說經者或專舉一誼或兼存二誼其說竝通非有違異也

荀悅孝惠皇帝紀五事一曰貌二曰言三曰視四曰聽五曰  
思心木為貌貌曰恭恭作肅肅時雨若厥福攸好德貌失厥  
咎狂厥罰常雨厥極惡金為言言曰從從作义义時暘若厥  
福康甯言失厥咎僭厥罰常暘厥極憂火為視視曰明明作  
哲哲時燠若厥福壽視失厥咎舒厥罰常燠厥極疾水為聽  
聽曰聰聰作謀謀時寒若厥福富聽失厥咎急厥罰常寒厥  
極貧土為思心思心曰容容作聖聖時風若厥福考終命思  
心失厥咎霧厥罰常風厥極凶短折皇之不極厥咎罷厥罰  
常陰厥極弱

案明作哲尚書正義云哲王肅及漢書五行志皆云哲智  
也鄭本作哲則讀為哲段玉裁曰按說文日部哲昭晰明

也从日折聲口部哲知也从口折聲心部哲敬也从心折  
聲三字各有所屬本義而經傳多相假借鴻範五行傳作  
愬而孟堅因之子雍從之作愬訓智此假愬為哲也漢書  
內多如此鄭本作哲云君視明則臣照哲照哲二字與說  
文昭晰同與易之明辨哲也同解非讀為哲也詩小旻正  
義引鄭注順小旻經文改為昭哲惠氏定宇集鄭注改為

照愬又引正義云哲讀為哲按正義鄭本作皆非耳宋元  
哲則讀為哲玩則字知讀為哲非鄭語皆非耳宋元  
疏云王肅及漢書五行志皆作哲定本作哲則讀為哲作  
正義者不暇分別愬哲之不同但以哲與哲則異耳漢書  
多愬哲不分如五行志云知人則愬刑法志云若隋書五  
云聖人既躬明愬之性愬民惟刑皆即哲字也若隋書五  
行志視之不明是謂不知此蓋古本尚書大傳作知古者  
哲訓知因以知代哲如夏紀知人則智宋世家明作智皆

智知通用宋世家以智代哲者蓋今文尚書作哲字也或問

說文口部哲字下又出悉字云哲或从心然則哲悉同字見於說文矣何子必分而二之應之曰心部悉敬也此許君原書也口部悉同哲此必淺人據漢書屏入者也讀書貴識古書之正譌段說是已

又案段玉裁曰古文尚書五曰思今文尚書作五曰思今本

尚書大傳鴻範五行傳次五事曰思心思心之不容今本改云

五事曰心維是謂不聖此一證也又曰禦思心於有九此思思之不容

二證也大傳注云凡貌言視聽思心今刻本無此二字文獻通考有一事

失則逆人之心又云包貌言視聽而載之以思心者又云

君思心不通又云思心曰土又云魯與思心之咎同耳又

云六事貌視言聽思心王極也此三證也漢書藝文志曰

貌言視聽思心失而五行之序亂此四證也五行志經曰

五曰思心今本無心思心曰容今本無心傳曰思心之不容是謂不

聖思心者心思慮也此釋思心甚明今本乃改云思之不容容寬也此五證

也高誘注戰國策引五行傳曰思心之不容是謂不聖此

六證也荀悅孝惠皇帝紀五曰思心今本無心土為思心思心

曰容容作聖今本譌作土為思思曰心心曰叡叡作聖此七證也孝昭皇帝紀

曰思心霧亂之應此八證也司馬紹統五行志曰思心不

容是謂不聖此九證也惟今文尚書作五曰思心思心曰

容而後伏生鴻範五行傳因之各家言五行傳者又因之

學者不知有思心往往妄為刪改又漢書五行志引鴻範

此經思下無心者小顏依古文尚書刪之也應劭注曰思

思慮按劭當云思心思慮也此用班語為注思心古文作思今

本應注纔三字淺人刪改之本也段說甚精確

又案古文尙書思曰睿今文尙書作思心曰容段玉裁云

洪範五行傳曰五事五曰思心思心之不容是謂不聖鄭

注曰容當爲睿睿通也此據孔安國本以正伏本其證一

也董仲舒春秋繁露曰五事五曰思心今本無心又曰思心今本無心

無曰容容者言無不容容作聖聖者設也王者心寬大無

不容則聖能施設事各得其宜也其證二也劉向說苑君

道篇尹文對齊宣王曰人君之事無爲而能容下大道容

眾大德容下聖人寡爲而天下理矣書曰容作聖此子政

引今文尙書也若作睿字則與上文不屬今本妄改作睿

非也其證三也五行志經曰五事五曰思心思心曰容容

作聖傳曰思心之不容是謂不聖思心者心思慮也容寬

也孔子曰居上不寬吾何以觀之哉言上不寬大包容臣

下則不能居聖位容字今本皆作容此容字少一畫也經

傳皆作容而以寬訓之一氣銜接倘易爲他字則不相貫

弗其證四也應劭注漢書云容古文作睿此正與韋昭云

古文台爲嗣古文隔爲擊孟康云祖古文言阻許叔重云

冑栞古文言由栞一例其下文蒙睿字云通也此識古文

異字異義而不若鄭注大傳直云容當爲睿者以班氏主

寬容之說非可憚背小顏漢書乃改正文作容謂睿睿爲

一字以傳合古文尙書說文睿在谷部深通川也睿在叔部通也小篆作叡古文作睿是睿

與睿截然二字又改應注睿通也爲睿通也移置古文作睿之上

強令容睿爲今古字若張晏注亦刪節不完度張注當云容古文作睿睿通也通達以至於聖凡十四字刪改之曰容通達以至於聖纔七字不可讀小顏之誤實因不解古文作睿之古文謂古文尙書直訓爲古字因謂容與睿同字容爲睿字誤重牴牾繆自小顏而前班書斷無作容者其證五也高誘戰國策云五行傳曰思心之不容是謂不聖其證六也司馬紹統及晉書隋書五行志皆引五行傳曰思心不容是謂不聖其證七也

惟沈約宋書作思心不睿豈從鄭大傳注與

詩小雅小旻鄭箋云書曰睿作聖明作哲聰作謀恭作肅從作艾詩人之意欲王敬用五事以明天道按此鄭引古文尙書也故睿不作容敬不作羞其不依尙書原文者依

詩經文爲序也說文十篇思容也从心囟聲向時錢辛楣少詹事亦舉爲睿作容之證玉裁按容乃容之字誤不得因伏董劉班說鴻範作思心曰容而謂許同也許此乃訓字非訓尙書也今本尙書思心曰容思不訓容謂思貴容耳不當爲是不完之語假令或云視明也聽聰也貌恭也言從也豈成文理乎容訓深通川也人之思如容川然思與容雙聲故以容訓思此如髮拔也尾微也門聞也戶護也皆以同音爲訓說文有此一例而字與容相似遂誤爲容矣說文之容誤爲容漢書之容誤更爲容真是物必有

耦至於容與睿二字形異音異義異小篆容古文作濬

引容小篆叡古文作睿此形異也容私閏切睿以芮切此

音異也毛詩故訓傳曰濬深也馬注尙書鄭注大傳許造說文皆曰睿通也此義異也思如容川而不期於睿則雖有深而不通者矣容者人所同然睿者道所必然也故思曰睿猶容曰睿也詹事嘗言春秋繁露漢書說文皆作容容字義長思主於睿則恐失之深刻玉裁按漢人所徵引尙書見於史記前後漢書者皆系伏生今文以功令所重博士所習也若鴻範五行傳出於伏生則思心曰容容作聖爲今文尙書無疑劉向說苑引容作聖容眾之說尤爲顯白詹事言容字義長竊有未安古文睿字畢竟勝於今文是以鄭用古文正大傳也但今文尙書並非伏生有誤是伏生所受本如是耳觀說苑尹文引尙書容作聖則作容非始伏生也又如黍始昉於唐山甫刑見於禮記譏諛諛言早錄於公羊是可證矣

春秋繁露五行五事篇曰王者與臣無禮貌不肅敬則木不曲直而夏多暴風風者木之氣也其音角也故應之以暴風王者言不從則金不從革而秋多霹靂霹靂者金氣也其音商也故應之以霹靂王者視不明則火不炎上而秋多電電者火氣也其音徵也故應之以電王者聽不聰則水不潤下而春夏多暴雨雨者水氣也其音羽也故應之以暴雨王者心不能容則稼穡不成而秋多雷雷者土氣也其音宮也故應之以雷五事一曰貌二曰言三曰視四曰聽五曰思何謂也夫五事者人之所受命於天也而王所修而治民也故王

者爲民治則不可以不明準繩不可以不正王者貌曰恭恭者敬也言曰從從者可從視曰明明者知賢不肖者分明黑白也聽曰聰聰者能問事而審其意也思曰容容者言無不容恭作肅從作乂明作哲聰作謀容作聖何謂也恭作肅言王誠能內有恭敬之姿而天下莫不肅矣從作乂言王者言可從明正從行而天下治矣明作哲哲者知也王者明則賢者進不肖者退天下知善而勸之知惡而恥之矣聰作謀謀者謀事也王者聰則聞事與臣下謀之故事無失謀矣容作聖聖者設也王者心寬大無不容則聖能施設事各得其宜也

案王鳴盛尚書後案曰五事配五行諸說互異貌木言金

視火聽水思土伏生董仲舒劉歆眭孟等之說災異班固之志五行鄭康成之注大傳竝同此說是也伏生等說本易八卦方位四正卦東震爲春爲木西兌爲秋爲金北坎爲冬爲水南離爲夏爲火土寄王西南位實中央五事分配之說卦傳云震動也兌說也坎陷也離麗也貌主動爲震言主說爲兌聽者耳有陷象爲坎視者光之麗於物爲離又云震爲足坎爲耳離爲目兌爲口耳目口固顯合而足亦貌之動也又云坎爲耳痛兌爲口舌注家云坎爲耳爲疾故爲耳痛兌得震聲故爲口舌又虞翻逸象云坤爲忠爲土坎爲虛爲入爲納離爲見爲明爲光是皆足以證伏生等說此外劉向則別爲一說攷庶徵兩乃貌不恭劉

歆以爲卽春秋大雨而劉向以爲卽大水旣以恆雨爲大水當貌不恭之罰則貌改屬水矣王充論衡訂鬼篇云鴻範五行言火同氣故童謠爲妖言世謂童子爲陽故妖言出小童童巫舍陽故大雩舞童暴巫又言毒篇云諺曰眾口爍金口者火也五行二曰火五事二曰言言與火直故云爍金金制於火火口同類也如劉向王充說推之旣以貌言改屬水火則當以視聽改屬木金惟思屬土仍伏生之舊耳此說在漢俗儒劫爲異論者誤以五事之次卽五行之次故也近人又衍其說云雨爲水易象坎爲雨雨與肅應則象當屬水暘爲火易象離爲火暘又與父應則言當屬火木爲煥煥應誓則視屬木金爲寒寒爲謀則聽屬

金云云不知坎本水也借雨以爲坎象不可卽以雨爲水離本火也借日以爲離象不可卽以日爲火況強木以爲煥而火位正南於時夏也反不得爲煥強金以爲寒而水位正北於時冬也反不得爲寒有是理乎然則貌言屬水火視聽屬木金者其說妄也其後俗儒又別造一說云脾之發爲貌而主土肺之發爲言而主金肝之發爲視而主木腎之發爲聽而主水心之發爲思而主火此說因五藏所屬推得本之內經素問乃醫家之言非鴻範義月令五時祭各以一藏爲先乃以性配五行之位而先祭之故正義引鄭駁異義云今文尚書歐陽說肝木也心火也脾土也肺金也腎水也古尚書說脾木也肺火也心土也肝金

也腎水也許慎謹案月令春祭脾夏祭肺季夏祭心秋祭肝冬祭腎與古尙書同鄭駁之云月令祭四時之位曰其藏之上下次之耳冬位在後而腎在下夏位在前而脾在上春位小前故祭先脾秋位小卻故祭先肝腎也脾也俱在鬲下肺也心肝也俱在鬲上祭者必三故有先後焉不得同五行之氣今醫病之法以肝爲木心爲火脾爲土肺爲金腎爲水則有瘳也若反其術不死爲劇是鄭論醫病之法當從今文尙書歐陽說不當從古尙書說但此旣是醫病之法則與鴻範之言理氣象數相爲配合者不同歐陽家說以之療病則可以之說經則謬鄭意已顯然矣蓋相配與相屬不同鴻範以其形象之相配者言醫家以其

氣質之相屬者言各有攸當不可強合爲一至許慎所從之古尙書說則與諸家又俱不同而別爲一義乃以貌爲木言爲火思爲土視爲金聽爲水鄭說旣斥其與醫理不合若以治疾非死必劇則其與鴻範不合又不待言矣五行事配五行總以伏鄭爲定喬樞謂王氏之說未諦蓋五行有相生之序有相克之序禹貢之六府孔修左氏傳以水火金木土穀言之此相克之序也鴻範之六珍作見伏生傳以木火土金水言之此相生之序也五行有生數之次有成數之次月令春其數八夏其數七秋其數九冬其數六此成數之次也鴻範一曰水二曰火三曰木四曰金五曰土此生數之次也惟月令中央土其數五與鴻範土數

同鄭注以爲土生數五成數十但言五者土以生爲本也然則知五行或以相生爲序或以相克爲序或以生數而言或以成數而言義各有取不必強合使一也春秋繁露五行之義篇曰五行一曰木二曰火三曰土四曰金五曰水木五行之始也水五行之終也土五行之中也此其天次之序也木生火火生土土生金金生水水生木此其父子也木居左金居右火居前水居後土居中央此其父子之序相受而布是故木受水火受木土受火金受土水受金也諸授之者皆其父受之者皆其子也常因其父以使其子天之道也今攷鴻範五行傳言長事一曰貌次二事曰言次三事曰視次四事曰聽次五事曰思心鄭注云貌

曰木言曰金視曰火聽曰水思心曰土按此亦以相克爲序但與六府又有順數逆數之不同六府之水火金木土皆已之所克順而數之者也五事之木金火水土皆已之所受克逆而數之者也至鴻範五行傳言人君行政之失則首言木不曲直次以火不炎上次以稼穡不成次以金不從革終以水不潤下是六沴之作與五行五事次序又不相同而與董子論五行之義適合蓋人君行政必順天之道天時首春主木次夏主火次季夏主中央土次秋主金次冬主水故以木爲五行之始土爲五行之中水爲五行之終王者發於其政必順天次之序而行也按齊詩四始之說毛詩正義引汜歷樞云大明在亥水始也四牡在

寅木始也嘉魚在巳火始也鴻雁在申金始也詩陳四始  
言水火金水本始之氣而不及土土所以不爲始者木火  
金水非土不成土王於四季爲四行之主卽月令季夏中  
央土之誼亦卽鴻範傳土次木火與金水中之誼春秋繁  
露所云木居左金居右火居前水居後土居中央相受而  
布者與此誼正同鴻範五行傳首言木者傳皆主王事而  
言此卽易帝出乎震之義易乾鑿度載孔子曰立德之數  
先立木五德以木爲首亦同此義也齊詩五際之說郎顛  
引詩犯歷樞曰卯酉之際爲革政午亥爲革命神在天門  
出入候聽言神在戌亥司候帝王興衰得失厥善則昌厥  
惡則亡亦與鴻範五事之次適合貌曰木言曰金此卽卯

酉之際也視曰火聽曰水此卽午亥之際也思心曰土此  
卽戌際也宋均注犯歷樞云神陽氣君象也天門戌亥之  
際開乾所據者按戌爲土位戌亥之間乾據之有君之象焉  
白虎通論五行曰行有五時有四何土尊不論職君不居  
部故時有四也鄭注鴻範五行傳曰思心曰土土王四時  
主消息生殺長藏之氣所以殖萬物之命者也然則思心  
之失厥咎尤重五際之戾尤以戌爲大故郎顛於順帝陽  
嘉中條對七事言於詩三豨高祖起亥仲二年今在戌仲  
十年今年仲竟來命入季宜因斯際大蠲法令改元更始  
也齊詩三豨之法犯歷樞云凡推其數皆從亥之仲起此  
天地所定位陰陽之氣週而復始萬物死而復蘇大統之

始此卽鴻範五行一曰水以水爲始之誼亦卽周易繫傳  
天一生水之誼也據此諸說亦足證五行先後之序各有  
不同者固各有所取義必欲比而同之則是執一不通之  
論未可爲訓也

鴻範五行傳曰長事一曰貌貌之不恭是謂不肅厥咎狂厥  
罰恆雨厥極惡時則有服妖時則有龜孽時則有雞旣時則  
有下體生上之病時則有青青青祥惟金沴木○注長猶君  
也肅敬也君貌不恭則是不能敬其事也君臣不敬則倨慢  
如狂矣貌曰木主春春氣生生氣失則踰其節故常雨也生  
氣失故於人則爲惡服貌之節也龜蟲之生於水而游於春  
者也屬木雞畜之有冠翼者也屬貌痲病也下體生上之病

貌氣失之病也青木色也青生於此祥自外來也沴殄也凡  
貌言視聽思心一事失則逆人之心人心逆則怨木金水火  
土氣爲之傷傷則衝勝來乘殄之於是神怒人怨將爲禍亂  
故五行先見變異以譴告人也及妖孽禍痲皆祥皆其氣類  
暴作非常爲時怪者也各以物象爲之占也

漢書五行志傳曰貌之不恭是謂不肅厥咎狂厥罰恆雨厥  
極惡時則有服妖時則有龜孽時則有雞旣時則有下體生  
上之病時則有青青青祥惟金沴木○韋昭曰下體生上若  
牛之足反出背上下欲伐上之禍也○李奇曰內曰青外曰  
祥○服虔曰沴害也○如淳曰沴音拂戾之戾義亦同

說曰凡草物之類謂之妖妖猶天胎言尙微蟲豸之類謂之

孽孽則牙孽矣及六畜謂之旤言其著也及人謂之痾痾病貌言寢深也甚則異物生謂之眚自外來謂之祥祥猶禎也氣相傷謂之沴沴猶臨莅不和意也每一事云時則曰絕之言非必俱至或有或亡或在前或在後也貌之不恭是謂不肅肅敬也內曰恭外曰敬人君行己體貌不恭怠慢驕蹇則不能敬萬事失在狂易故其咎狂也上嫚下暴則陰氣勝故其罰常雨也水傷百穀衣食不足則姦軌竝作故其極惡也一曰民多被刑或形貌醜惡亦是也風俗狂慢變節易度則爲剽輕奇怪之服故有服妖水類動故有龜孽於易巽爲雞雞有冠距文武之象不爲威儀貌氣毀故有雞旤一曰水歲雞多死及爲怪亦是也上失威儀則下有疆臣害君上者故有下體生於上之痾木色青故有青眚青祥凡貌傷者病木氣則金沴之衝氣相通也於易震在東方爲春爲木也兌在西方爲秋爲金也離在南方爲夏爲火也坎在北方爲冬爲水也春與秋日夜分寒暑平是以金木之氣易以相變故貌傷則致秋陰常雨言傷則致春陽常旱也至於冬夏日夜相反寒暑殊絕水火之氣不得相併故視傷常與聽傷常寒者其氣然也逆之其極曰惡順之其福曰攸好德

案五行志又云劉歆貌傳曰有鱗蟲之孽羊旤鼻痾說以爲天文東方辰爲龍星故爲鱗蟲於易兌爲羊木爲金所病故致羊旤旤與常雨同應此說非是春與秋氣陰陽相敵木病金盛故能相并此一事耳旤與妖痾祥眚同類不

得獨異班不從劉歆說者以五行傳是伏生所傳授孝武  
時夏侯始昌通五經善推五行傳以傳族子勝下及許商  
皆以教所賢弟子其傳與劉向同惟劉歆傳獨異與今文  
家尚書說不合故所不取或曰歆好古文尚書者歆傳當  
是用古文說喬樅謂子政亦嘗據中古文尚書考其同異  
而其傳仍與夏侯等同可見古文今文於鴻範五行五事  
休咎之徵竝無異說又班氏一再引劉歆說以爲羸蟲之  
孽屬思心不容劉歆以爲庶徵皆以蟲爲孽思心羸蟲孽  
也作思心作容皆歆用今文尚書之驗然則歆傳之獨異  
者蓋亦未免好奇之過歟

續漢書五行志五行傳曰貌之不恭是謂不肅厥咎狂厥罰

恆雨厥極惡時則有服妖時則有龜孽時則有雞禍時則有  
下體生上之痢時則有青眚青祥惟金沴木

說云氣之相傷謂之沴

南齊志貌傳曰失威儀之制怠慢驕恣謂之狂則不肅矣下  
不敬則上無威天下既不敬又肆其驕恣肆之則不從夫不  
敬其君不從其政則陰氣勝故曰厥罰常雨

貌傳又曰上失節而狂下怠慢而不敬上下失道輕法侵制  
不顧君上因以薦饑

又曰上下不相信大臣姦宄民爲寇盜故曰厥極惡一曰民  
多被刑或形貌醜惡

又曰危亂端見則天地之異生木者青故曰青眚爲惡祥凡

貌傷者金沴木木沴金衝氣相通

隋志鴻範五行傳曰陰氣彊積然後生水雨之災

太平御覽咎徵部鴻範五行傳曰凡有所害謂之災無所害而異於常謂之異故災爲已至異爲方來

春秋繁露五行五事篇曰王者能敬則肅肅則春氣得故肅者主春春陽氣微萬物柔易移弱可化於時陰氣爲賊故王者欽欽不以議陰事然後萬物遂生而木曲直也春行秋政則草木凋行冬政則雪行夏政則殺春失政則秋霜不降雷不藏

說苑修文篇書曰五事一曰貌貌若男子之所以恭敬婦人之所以姣好也行步中矩折旋中規立則磬折拱則抱鼓其

以入君朝尊以嚴其以入宗廟敬以忠其以入鄉曲和以順

其以入州里族黨之中和以親詩曰溫溫恭人惟德之基孔

子曰恭近於禮遠恥辱也

風俗通過譽篇曰鴻範陳五事以貌爲首

後漢書陳忠傳忠上疏曰臣聞鴻範五事一曰貌貌以恭恭

作肅貌傷則狂而致常雨

續漢書五行志注引蔡邕對問曰臣聞陽微則日蝕陰盛則

地震思亂則風貌失則雨視闇則疾簡宗廟水不潤下川流

滿溢明君臣正上下抑陰尊陽修五事於聖躬致精慮於其

御其救之也

續漢書五行志贊曰皇極維建五事克端罰咎入沴逆亂侵

干火下水騰木弱金酸妖豈或妄氣災以觀言人言豈國  
三國志秦宓傳宓報李權書曰鴻範記災發於言貌

鴻範五行傳曰次二事曰言言之不從是謂不艾厥咎僭厥  
罰常陽厥極憂時則有詩妖時則有介蟲之孽時則有大禍  
時則有口舌之痾時則有白眚白祥維火沴金○注艾治也  
君言不從則是不能治其事也君臣不治則僭差矣言曰金  
金主秋秋氣殺殺氣失故常陽也殺氣失故於人爲憂詩之  
言志也喙螽蝓蟬之類蟲之生於火而藏於秋者也屬金犬  
畜之以口吠守者也屬言口舌之痾者言氣失之病也

漢書王莽傳書云言之不從是謂不艾○師古曰鴻範之言  
艾讀曰又又治也

又曰太白司艾西嶽國師典致時陽○應劭曰言之不從是  
謂不艾艾安也厥罰常陽陽旱也○師古曰艾讀曰又

大案據應劭注以艾字訓安當本之今文家尙書章句亦漢  
經師相傳舊說也鄭君訓艾爲治者三家尙書有歐陽大  
乘小夏侯之別故各守其師說間有不同耳段玉裁曰王莽  
口傳書云言之不從是謂不艾此引五行傳也古人傳引或  
以傳繫之經或以緯系之經此類是已暘尙書大傳宋世  
家漢紀論衡皆作暘五行志及王莽傳作陽假借字耳

漢書五行志傳曰言之不從是謂不艾厥咎僭厥罰恆陽厥  
極憂時則有詩妖時則有介蟲之孽時則有大猷時則有口  
舌之痾時則有白眚白祥惟木沴金言之不從從順也是謂

不艾艾治也孔子曰君子居其室出其言不善則千里之外  
違之况其邇者乎詩云如蜩如螗如沸如羹言上號令不順  
民心虛譁憤亂則不能治海內失在過差故其咎僭僭差也  
刑罰妄加羣陰不附則陽氣勝故其罰常陽也旱傷百穀則  
有寇難上下俱憂故其極憂也君炕陽而暴虐臣畏刑而鉗  
口則怨謗之氣發於謠謠故有詩妖介蟲孽者謂小蟲有甲  
飛揚之類陽氣所生也於春秋爲蝻今謂之蝗皆其類也於  
易兌爲口犬以吠守而不可信言氣毀故有犬旤一曰旱歲  
犬多狂死及爲怪亦是也及人則多病口喉欬者故有口舌  
疔金色白故有白眚白祥凡言傷者病金氣金氣病則木沴  
之其極憂者順之其福曰康甯也○魏世曰言之不從其

案五行志又引劉歆言傳曰時有毛蟲之孽說以爲於天

又曰文西方參爲虎星故爲毛蟲云云與伏生大傳義異

續漢書五行志五行傳曰言之不從是謂不父厥咎僭厥罰  
恆陽厥極憂時則有詩妖時則有介蟲之孽時則有犬旤時  
則有口舌之疔時則有白眚白祥惟木沴金

案續志又云介蟲劉歆傳以爲毛蟲則是應劭等亦兼存

異義也

春秋考異郵曰君行非是則言不見從言不見從則下不治  
下不治則僭差過制度奢侈驕泰天子僭天大夫僭人主諸  
侯僭土陽無以制從心之喜上憂下則常陽從之推設其蹟  
考之天意則大旱不雨而民庶大灾

案劉昭續志往補引春秋說如此今攷其說與鴻範五行  
傳大指相同故附載之亦足以見春秋說亦用今文家尙  
下書之學也  
南齊志言傳曰言易之道西方曰兌爲口人君過差無度刑  
罰不一斂從其重或有師旅炕陽之節若動眾勞民是言不  
從人君旣失眾政令不從孤陽持治下畏君之重刑陽氣勝  
則旱象至故曰厥罰常陽也

又曰下旣悲苦君上之行又畏嚴刑而不敢正言則必先發  
於歌謠歌謠口事也口氣逆則惡言或有怪謠焉

又曰言氣傷則民多口舌故有口舌之病金者白故有白眚  
若有白爲惡祥

隋志鴻範五行傳曰君持亢陽之節興師動眾勞人過度以  
起城邑不顧百姓臣下悲怨然而心不能從故陽氣盛而失  
度陰氣沈而不附陽氣盛旱災應也  
又曰犬守禦者也

藝文類聚鴻範五行傳曰旱所謂常陽不謂常陽而謂旱者  
以爲災也旱之爲言乾萬物傷於乾不得水也

案藝文類聚又引君持亢陽之節云云與隋志引言傳文  
同惟興師動眾上有暴虐於民四字無過度二字又太平  
御覽咎徵部引與藝文類聚略同

開元占經百十三鴻範五行傳曰下旣非君上之刑畏嚴刑  
而不敢正言則先發於歌歌口事也氣逆則惡言至或有怪

三清經解  
謠以此占之故曰詩妖古者人君必視人民聽其歌謠以省國政

又一百十九五行傳曰犬既者西方也以口守言之類也言氣毀則犬傷疾矣故曰犬傷禍也旱氣犬多狂死或言氣亂則犬爲怪以期占之  
又一百二十五行傳曰介蟲者小蟲有甲能飛揚之類陽氣所生於春秋爲蝻今謂之蝗皆其類也旱氣動象至矣故曰有介蟲之孽也

春秋繁露五行五事篇曰王者能治則義立義立則秋氣得故義者主秋秋氣始殺王者行小刑罰民不犯則禮義成於時陽氣爲賊故王者輔以官牧之事然後萬物成熟秋草木

不榮華金繩革也秋行春政則華行夏政則喬行冬政則落秋失政則春天風不改雷不發

論衡言毒篇曰諺曰眾口爍金口者火也五行二曰火五事二曰言言與火直故云爍金道口舌之爍不言拔木熠火必云爍金金制於火火口同類也故火爲言言爲小人小人爲妖由口舌口舌之徵由人感天故五事二曰言言之咎徵僭恆暘若僭者奢麗故蝮蛇多文文起於陽故暘若致文暘若則言不從故時有詩妖妖氣生美好故美好之人多邪惡美味腐腹好色惑心勇夫招禍辯口致殃四者世之毒也辯口之毒爲害尤酷詩曰讒言罔極交亂四國四國猶亂況一人

乎  
今文尚書經說攷十四中

又訂鬼篇曰世謂童謠熒惑使人彼言有所見也熒惑火星  
鴻範五行二曰火五事三曰言言火同氣故童謠詩歌爲妖  
言言出文成故世有文書之怪世謂童子爲陽故妖言出於  
小童童巫含陽故大雩之祭舞童暴巫巫含陽能見爲妖者  
也妖或施其毒不見其體或見其形不施其毒或出其聲不  
成其言或明其言不知其音若夫申生見其體成其言者也  
柱伯之屬見其體施其毒者也詩妖童謠石言之屬明其言  
者也濮水琴聲紉郊鬼哭出其聲者也

案王充論衡多用今文尙書說茲言毒篇以鴻範五行五  
事言火相直訂鬼篇以鴻範五行五事言火同氣其誼與  
漢書所載鴻範五行傳異而於古尙書說有適合者許慎

五經異義載古尙書說云脾木也肺火也肝金也腎水也  
心土也今按其說亦具有義理脾主四肢手足者容貌之  
動也猶木有枝幹也故脾屬木肺主音聲語言□□□□  
也火之氣發揚於上者肺教也言其氣教發也言與火同  
氣故肺屬火肝主目目者肝之使明能察物猶金之內景  
鑑物好醜莫遁其形也故肝屬金腎引也主引水氣灌注  
諸脉也坎之象爲耳耳者腎之候也故腎屬水金木水火  
以土爲主貌言視聽以心爲主故思心屬土也白虎通情  
性篇云肝者木之精也目爲之候肺者金之精也鼻爲之  
候心者火之精也耳爲之候腎者水之精也雙竅爲之候  
脾者土之精也口爲之候旣引元命包以證其說又云或

曰口者心之候耳者腎之候或曰肝繫於目肺繫於鼻心繫於口脾繫於舌腎繫於耳則亦兼存異義以備一解論衡所述鴻範之義以火爲口同類卽所謂心繫於口口者心之候也以言爲火同氣卽所謂肺主音聲言於五行屬火也許氏五經異義據月令春祭脾夏祭肺季夏祭心秋祭肝冬祭腎從古尙書說而說文解字則云心人心土藏在身之中博士說以爲火藏博士說者今文尙書家言也肉部又云肝木藏也肺金藏也脾土藏也腎水藏也脾爲土藏則心乃火藏也許意似以今文尙書說爲定論與五經異義所從不同蓋師說相傳由來已久雖折衷以求一是而於異義亦存而不廢學者博觀而會通之不可泥於

斯一家之言是此而非彼也

曰又案開元占經三十引鴻範五行傳云熒惑於五常爲禮斯五事爲視禮虧視失則熒惑爲旱災爲妖言爲火怪占經引四千五引五行傳云太白於五常爲義於五事爲言義虧言言失則太白爲變動是五事之言本屬金爲妖言爲火之變異此卽金制於火火能爍金之誼當分別言從與妖言而二之論衡言毒訂鬼二篇專指妖言而論其誼亦本於鴻範五行傳王鳴盛尙書後案乃謂王充說以言改屬火此漢俗儒辨爲異論者誤以五事之次卽五行之次故也蓋亦考之不審耳若劉向之以恆雨卽大水雨與水潦本相連及向之五行傳與夏侯氏同竝無異誼更不得泥此

卦端誣向之改貌以為屬水也至於今文家歐陽夏侯等說鄭駁異義所信從者王氏乃云歐陽家說以之療病則可以之說經則謬鄭意顯然不思形象相配與氣質相屬理無二致義有同歸必以其從同者強析為岐異則既誣歐陽竝且誣鄭母乃自相刺謬乎鴻範五行傳曰次三事曰視視之不明是謂不愆厥咎茶厥鴻範五行傳曰次三事曰視視之不明是謂不愆厥咎茶厥罰常與厥極疾時則有草妖時則有倮蟲之孽時則有羊馯時則有目痾時則有赤眚赤祥維水沴火注愆視瞭也君視不明則是不能瞭其事也茶緩也君臣不瞭則茶緩矣視曰火火主夏夏氣長長氣失故常與也長氣失故於人為疾視之物可見者莫眾於草蠶螟蟲之類蟲之生於火而藏於

秋者也羊畜之遠視者也屬視

漢書五行志傳曰視之不明是謂不愆厥咎舒厥罰恆與厥極疾時則有草妖時則有羸蟲之孽時則有羊馯時則有目痾時則有赤眚赤祥惟水沴火視之不明是謂不愆愆知也詩云爾德不明目亡陪亡卿不明爾德目亡背亡仄言上不明暗昧蔽惑則不能知善惡親近習長同類亡功者受賞有罪者不殺百官廢亂失在舒緩故其咎舒也盛夏日長暑日養物政弛緩故其罰常與也與則冬温春夏不和傷病民人故極疾也誅不行則霜不殺草繇臣下則殺不以時故有草妖凡妖貌則目服言則以詩聽則以聲視則以色者五色物之大分也在於眚祥故聖人以為草妖失秉之明者也温與

生蟲故有羸蟲之孽謂螟螣之類當死不死未當生而生或多於故而爲災也於易剛而包柔爲離離爲火爲目羊上角下蹠蹠剛而包柔羊大目而不精明視氣毀故有羊蹠一曰暑歲羊多疫死及爲怪亦是也及人則多病目者故有目痲火色赤故有赤眚赤祥凡視傷者病火氣火氣傷則水沴之其極疾者順之其福曰壽○師古曰奧讀曰燠燠暝也蠹螟之類無鱗甲毛羽故謂之羸蟲也

案五行志引劉歆以爲羸蟲之孽屬思心不容與伏生大傳異又引劉歆視傳曰有羽蟲之孽雞既說以爲於天文南方喙爲鳥星故爲羽蟲既亦從羽故爲雞雞於易自在巽說非是

續漢書五行志五行傳曰視之不明是謂不愆厥咎舒厥罰常燠厥極疾時則有草妖時則有羸蟲之孽時則有羊禍時則有赤眚赤祥惟水沴火

案續志又云羸蟲劉歆傳以爲水蟲劉昭注補於厥咎舒引讖曰君舒怠臣下有倦白黑不別賢不肖竝不能憂民急氣爲之舒緩草不搖其說亦與五行傳相發明也

隋志劉向五行傳曰視不明用近習賢者不進不肖不退百職廢壞庶士不從其過在政教舒緩

又引鴻範五行傳曰羊禍君不明逆火政之所致也南齊志傳曰犯上者不誅則草犯霜而不死或殺不以時事在殺生失柄故曰草妖也一曰草妖者失眾之象也

春秋繁露五行五事篇曰王者能知則知善惡知善惡則夏氣得故哲者主夏夏陽氣始盛萬物兆長王者不揜明則道不退塞而夏至之後大暑隆萬物茂育懷任王者恐明不知賢不肖分明白黑於時寒爲賊故王者輔以賞賜之事然後夏草木不霜火炎上也夏行春政則風行秋政則水行冬政則落夏失政則冬不凍冰五穀不藏大寒不解

案王者能知疑知字是哲之誤下文云哲者主夏可證

鴻範五行傳曰聽之不聰是謂不謀厥咎急厥罰常寒厥極貧時則有鼓妖時則有魚孽時則有豕禍時則有耳病時則有黑眚黑祥維土沴水○注君聽不聰則是不能謀其事也君臣不謀則急矣聽曰水水主冬冬氣藏藏氣失故常寒也

藏氣失故於人爲貧鼓聽之應也魚蟲之生於水而遊於水者也豕畜之居閉衛而聽者也耳病聽氣失之病

漢書五行志傳曰聽之不聰是謂不謀厥咎急厥罰恆寒厥極貧時則有鼓妖時則有魚孽時則有豕禍時則有耳病時則有黑眚黑祥惟火沴水聽之不聰是謂不謀言上偏聽不聰下情隔塞則不能謀慮利害失在嚴急故其咎急也盛冬日短寒以殺物政促迫故其罰常寒也寒則不生百穀上下俱貧故其極貧也君嚴猛而閉下臣戰栗而塞耳則妄聞之氣發於音聲故有鼓妖寒氣動故有魚孽雨以龜爲孽龜能陸處非極陰也魚去水而死極陰之孽也於易坎爲豕豕大耳而不聰察聽氣毀故有豕禍也一日寒歲豕多死及爲怪

亦是也及人則多病耳者故有耳疴水色黑故有黑眚黑祥  
凡聽傷者病水氣水氣病則火沴之其極貧者順之其福曰  
富案五行志引劉歆傳曰有介蟲孽也又桓公五年秋螽劉  
日歆以爲食虐取民則螽介蟲之孽也與魚同占劉向以爲  
介蟲之孽屬言不從又嚴公二十九年有蜚劉歆以爲負  
順蠶也性不食穀食穀爲灾介蟲之孽劉向以爲蜚色青近  
青眚也諸如此類皆歆說與夏侯等不同者也  
續漢書五行志五行傳曰聽之不聰是謂不謀厥咎急厥罰  
恆寒厥極貧時則有鼓妖時則有魚孽時則有豕禍時則有  
耳疴時則有黑眚黑祥惟火沴水爲災

案續志又云魚孽劉歆傳以爲介蟲之孽謂蝗屬也劉昭  
注引月令章句曰介者甲也謂龜蟹之屬也與五行傳註

異案續志又云魚孽劉歆傳以爲介蟲之孽謂蝗屬也劉昭

又案劉昭注補引馬融尙書注曰上聰則下進其謀又引  
易傳曰誅罰絕理不云下也類事有知不云謀也是昭意  
以咎急爲不聰之應聰謀皆就君上言之不必分屬上下  
喬樅謂馬融用古尙書說故解與今文家微有不同要其  
誼亦互相備也今文尙書以恭肅從又明悉聰謀容聖皆  
就君身爲解漢書五行志引五行傳說云云皆其明證尙  
書正義引鄭君注云君貌恭則臣禮肅君言從則臣職治  
君視明則臣昭哲君聽聰則臣進謀君思睿則臣賢智鄭

注尙書亦用古文說故與馬融解合其注伏生大傳則用  
今文說云君貌不恭則是不能敬其事也君言不從則是  
不能治其事也君視不明則是不能瞭其事也君聽不聰  
則是不能謀其事也君思心不通則是非不能心明其事  
也皆就君上言之與漢書志所引五行傳說言不昭合惟  
於傳言咎徵之應注云君臣不敬則倨慢如狂矣君臣不  
治則僭差矣君臣不瞭則舒緩矣君臣不謀則急矣君臣  
心有不明則相蒙冒矣蓋君臣一體補出入臣共層明臣  
亦當敬用五事於義尤備若不觀其會通但泥於一隅之  
見以恭肅等分屬君臣則顯與下文庶徵曰肅時雨若云  
云誼不一貫誠有如沖遠所譏庶徵之應休咎皆肅又明

聰所致若肅又明聰皆是臣事則休咎之所致悉不由君  
矣以馬鄭大儒豈其所見出沖遠下哉攷南齊書五行志  
引貌傳曰失威儀之制怠慢驕恣謂之狂則不肅矣下不  
敬則主無威天下既不敬又肆其驕恣肆之則不從夫不  
敬其君不從其政則陰氣勝故曰厥罰常雨又曰上失節  
而狂下急慢而不敬上下失道輕法侵制不顧君上因以  
薦饑又曰上下不相信夫臣姦宄民爲寇盜故曰厥極惡  
則固明明兼君臣上下言之五行志所引上慢下暴則陰  
氣勝故其罰常雨亦已明明兼上下言之何得謂休咎所  
致悉不由君邪又攷詩小雅小旻篇曰國雖靡止或聖或  
否民雖靡盬或哲或謀或肅或艾鄭箋云天下諸侯雖無

禮其心性猶有通明者有賢者民雖無法其心性猶有知者有謀者有肅者有艾者王何不擇置之於位而任之為治據此足見鴻範五事實包君與民言之則又不獨兼君臣而已也蓋天生蒸民有物有則民之秉彝好是懿德此五事乃人性行之能故其心性皆有此德也春秋繁露五行五事篇云恭作肅言王誠能內有恭敬之姿而天下莫不肅矣從作又王者言可從明正從行而天下治矣明作哲哲者明也王者明則賢者進不肖者退天下知善而勤之知惡而恥之矣聰作謀謀者謀事也王者聰則聞事能辨下謀故事無失謀矣推言其故且廣之於天下非止君之一身也董子之時今文尚書始萌芽古文尚書雖出孔

壁世無能通之者而其解五事已有此說則知此為經師相承古訓矣合此諸說而觀其會通則知鄭意未嘗不以太肅又哲謀聖為君事特欲見君臣一體休咎之應亦君臣共致之故著此誼爾

南齊志聽傳曰不聰之象見則妖生於耳以類相動故曰有鼓妖也一曰聲屬鼓妖

又曰極陰氣動故有魚孽魚孽者常寒之罰也  
又曰大雨雪猶庶徵之常雨也然有甚焉雨陰大雨雪者陰之畜積甚也一曰與大水同象

又曰雨雹君臣之象也陽之氣專為雹陰之氣專為霰陽專而陰脅之陰盛而陽薄之雹者陰薄陽之象也霰者陽脅陰

之符也春秋不書霰者猶月食也

隋志洪範五行傳曰雪庶徵之常雨也然尤甚焉雨陰也雪又陰畜積甚盛也皆妾不妾臣不臣之應

又曰魚陰類也下人象又有鱗甲兵之應也又曰急之所致又曰刑罰暴虐貪饕不厭興師動眾取城修邑而失眾心則蟲爲災

開元占經一百二十洪範傳曰聽之不聰是謂不謀君嚴寒氣動故有魚孽魚去水而死極陰之孽也

太平御覽天部洪範五行傳曰人君妬賢嫉善在下謀上則日蝕雨雹殺鳥獸

春秋繁露五行五事篇曰王者無失謀然後冬氣得故謀者主冬冬陰氣始盛草木必死王者能聞事審謀慮之則不侵伐不侵伐且殺則死者不恨生者不怨冬日至之後大寒降萬物藏於下於時暑爲賊故王者輔之以急斷之以事水潤下也冬行夏政則蒸行春政則雷行秋政則旱冬失政則夏草木不實五穀疾枯

鴻範五行傳曰思心之不容是謂不聖厥咎霧厥罰常風厥極凶短折時則有脂夜之妖時則有華孽時則有牛旤時則有心腹之痾時則有黃眚黃祥維木金水火沴土○注容當爲睿睿通也心明曰聖孔子說休徵曰聖者通也兼四而明明則可謂聖聖者包貌言視聽而載之以思心者通以待之君思心不通則是非不能心明其事也霧冒也君臣心有不通

明則相蒙冒矣思心曰土土王四時主消息生殺長藏之氣  
風亦出內雨暘寒奧之微皆所以殖萬物之命者也殖氣失  
故常風殖氣失則於人爲凶短折未齟曰凶未冠曰短未昏  
曰折夜讀曰液華當爲夸夸蚓蟲之生於土而遊於土者地  
厚德載物牛畜之任重者也屬思心心腹之病思心氣失之  
病志論皆言君不寬容則地動元或疑焉今四行來沴土地  
乃動臣下之相帥爲畔逆之象君不通於事所致也以爲不  
寬容亦皆爲陰勝陽臣強君之異

漢書五行志傳曰思心之不容是謂不聖厥咎霧厥罰恆風  
厥極凶短折時則有脂夜之妖時則有華孽時則有牛旣時  
則有心腹之病時則有黃眚黃祥時則有金木水火沴土思

心之不容是謂不聖思心者心思慮也容寬也孔子曰居上  
不寬吾何以觀之哉言上不寬大包容臣下則不能居聖位  
貌言視聽以心爲主四者皆失則區霧無識故其咎霧也雨  
旱寒奧亦以風爲本四氣皆亂故其罰常風也常風傷物故  
其極凶短折也傷人曰凶禽獸曰短少木曰折一曰凶天也  
兄喪弟曰短父喪子曰折在人腹中肥而包裹心者脂也心  
區霧則冥晦故有脂夜之妖一曰有脂物而夜爲妖若脂水  
夜汗人衣淫之象也一曰夜妖者雲風竝起而杳冥故與常  
風同象也溫而風則生螟螣有裸蟲之孽劉向以爲於易巽  
爲風爲木卦在三月四月繼陽而治主木之華實風氣盛至  
秋冬木復華故有華孽一曰地氣盛則秋冬復華一曰華者

色也土爲內事爲女孽也於易坤爲土爲牛牛大心而不能  
思慮思心氣毀故有牛旤一曰牛多死及爲怪亦是也及人  
則多病心腹者故有口腹之疴土色黃故有黃眚黃祥凡思  
心傷者病土氣土氣病則金木水火沴之故曰時則有金木  
水火沴土不言惟而曰時則有者非一衝氣所沴明其異大  
也其極曰凶短折順之其福曰考終命

案五行志又引劉歆思心傳曰時則有羸蟲之孽謂螟螣  
之屬也庶徵之常風劉向以爲春秋無其應釐公十六年  
正月六鵙退蜚過宋都左氏傳曰風也劉歆以爲風發於  
它所至宋而高鵙高蜚而逢之則退經以見者爲文故記  
退蜚傳以實應著言風常風之罰也象宋襄公區霽自用

不容臣下逆司馬子魚之諫而與疆楚爭盟後六年爲楚  
所執應六鵙之數云喬樅謂歆傳言庶徵常風之應以六  
鵙退飛象宋襄公區霽自用不容臣下爲常風之罰是亦  
其用今文尚書之一明驗也若古文以容作睿訓爲通達  
則顯與歆傳云云不合故知歆傳亦今文家言雖其說獨  
異而班氏亦附載之以備參攷云

漢書敘傳曰思心旤霽  
續漢書五行志五行傳曰思心不容是謂不聖厥咎霽厥罰  
恆風厥極凶短折時則有脂夜之妖時則有華孽時則有牛  
旤時則有心腹之疴時則有黃眚黃祥惟金木水火沴土  
案續志又云華孽劉歆傳爲羸蟲之孽謂螟屬也

南齊志思心傳曰心者土之象也思心不容案志文作其過

在於猶亂失紀風於陽則為陰於陰則為大臣之象專恣而

氣盛故罰常風心五事主猶土為五行主也一日陰陽相薄

偏氣陽多為風其甚也常風陰氣多者陰而不雨其甚也常

陰一日風宵起而晝晦以應常陰同象也

又曰雷電所擊蓋所感也皆思心有尤之所致也

又曰山之於地君之象也山崩君權損京陵易處世將變也

陵轉為澤貴將為賤也

又曰土氣亂者木金水火亂之

隋志五行傳曰華者猶榮華容色之象也以色亂國故謂華

孽不容

又曰晝而晦冥若夜者陰侵陽臣將侵君之象也

又曰牛事應宮室之象也

開元占經三鴻範五行傳曰清明者天之體也天忽變色是

謂易常天裂見人鳴有聲至尊憂且驚皆亂國之兆

開元占經六鴻範五行傳曰日正晝而冥晦者陰反為陽臣

反制君也

開元占經四尚書夏侯說曰地動大臣盛將有為下不靜兵

數動也

又引劉向鴻範傳曰地動者臣不臣也臣下大貴也

案尚書夏侯說當即夏侯始昌五行傳之文

八政一曰食二曰貨三曰祀四曰司空五曰司徒六曰司寇七

皇清經解續編  
卷十四  
三  
曰賓八曰師

史記宋世家八政一曰食二曰貨三曰祀四曰司空五曰司徒六曰司寇七曰賓八曰師○集解馬融曰司空掌營城郭主空土以居民司寇主誅寇害鄭元曰賓掌諸侯朝覲之官師掌軍旅之官

尚書大傳鴻範傳曰八政何以先食傳曰食者萬物之始人事之本也故八政先食

漢書食貨志曰鴻範八政一曰食二曰貨食謂農殖嘉穀可食之物貨謂布帛可以及金刀龜貝可以分財布利通有無者也二者生民之本堯命四子以敬授民時舜命后稷以黎民祖饑是爲政首禹平洪水定九州制土田各因所生遠近賦入貢棐懋遷有無萬國作乂財者帝王所以聚人守位養成羣生奉順天德治國安民之本也

又藝文志曰農家者流蓋出於農稷之官播百穀勸耕桑以足衣食故八政一曰食二曰貨孔子曰所重民食此其所長也

又王莽傳曰民以食爲命以貨爲資是以八政以食爲首論衡譏日篇曰人道所重莫如食急故八政一曰食二曰貨衣服貨也

後漢書章帝紀元和元年詔曰王者八政以食爲本故古者急耕稼之業致耒耜之勤節用儲蓄以備凶災是以歲雖不登而人無饑色

漢書郊祀志曰鴻範八政三曰祀祀者所以昭孝事祖通神明也旁及四夷莫不修之下至禽獸豺獾有祭是以聖王爲之典禮民之精爽不貳齊肅聰明者神或降之在男曰覲在女曰巫使祭神之處位爲之牲器使先聖之後能知山川敬於禮儀明神之事者曰爲祝能知四時犧牲壇場上下氏姓所出者以爲宗故有神民之官各司其序不相亂也民神異業敬而不黷故神降之嘉生民以物序灾禍不至所求不匱及少昊之衰民神雜擾不可放物家爲巫史享祀無度黷齊明而神弗蠲嘉生不降禍灾荐臻莫盡其氣顛頊受之迺命南正重司天以屬神命火正黎司地以屬民使復舊常亡相侵黷故郊祀社稷所從來尙矣虞書曰舜在璿璣玉衡以齊

七政遂類于上帝禋于六宗望秩于山川徧于羣神禹遵之漢書刑法志曰夫人肖天地之貌懷五常之性聰明精粹有生之最靈者也鴻範曰天子作民父母爲天下王聖人取類以正名而謂君爲父母明仁愛德讓王道之本也愛待敬而不敗德須威而久立故制禮以崇敬作刑以明威也聖人旣躬明愆之性必通天地之心制禮作教立法設刑動緣民情而則天象地故曰先王立禮則天之明因地之性也刑罰威獄以類天之震曜殺戮也溫慈惠和以效天之生殖長育也書云天秩有禮天討有罪故聖人因天秩而制五禮因天討而作五刑其所繇來者上矣

漢書藝文志曰儒家者流蓋出於司徒之官助人君順陰陽

明教化者也

又曰兵權謀者以正守國以奇用兵先計而後戰兼形勢包陰陽用技巧者也兵形勢者雷動風舉後發而先至離合背鄉變化無常以輕疾制敵者也陰陽者順時而發推刑德隨斗擊因五勝假鬼神而爲助者也技巧者習手足便器械積機關以立攻守之勝者也兵家者蓋出古司馬之職王官之武備也鴻範八政八曰師孔子曰爲國者足食足兵以不教民戰是謂棄之明兵之重也

案藝文志又云形法者大舉九州之執以立城郭室舍形人及六畜骨法之度數器物之形容以求其聲氣貴賤吉凶猶律有長短而各徵其聲非有鬼神數自然也然形與氣相首尾亦有有其形而無其氣有其氣而無其形此精微之獨異也法家者流蓋出於理官信賞必罰以輔禮制易曰先王以明罰飭法此其所長也喬樅謂形法者大舉九州之執以立城郭室舍是卽八政中司空之事法家出於理官亦卽八政中司寇之事也

又案尙書正義引鄭云此數本諸其職先後之宜也食謂掌民食之官若后稷者也貨掌金帛之官若周禮司貨賄是也祀掌祭祀之官若宗伯者也司空掌居民之官司徒掌教民之官司寇掌詰盜賊之官賓掌諸侯朝覲之官周禮大行人是也師掌軍旅之官若司馬者也攷曲禮正義引鄭大傳注云夏六卿者后稷司徒秩宗司馬作士共工

也則此八政皆爲六卿所掌之事矣尙書後案曰此經八政正是禹之所演宜爲夏制堯典云女后稷播時百穀周語云昔我先王世后稷賈公彥周禮疏云堯初天官爲稷至試舜又改名百揆舜又命禹爲之至夏時仍爲后稷矣胡渭據陳櫟云八政在唐虞食貨合爲一而稷掌之禹暨稷播奏庶艱食鮮食懋遷有無化居則食貨皆其所掌王制家宰以三十年之通制國用量入以爲出蓋自古食貨皆掌於天官如此鄭言秩宗舜時始置則夏秩宗必沿虞制也鄭言初堯冬官爲共工舜攝位舉禹治水改名司空以命之說苑淮南子竝同據王制殷有司空馬融注書序云咎單作湯司空疑必因夏制也司徒虞官夏因之司空虞時本號作士據此經則夏已改司寇矣周禮大行人掌大賓之禮及大客之儀以親諸侯以下備載朝覲之禮鄭彼注云大賓要服以內諸侯大客謂其孤卿是也但不知夏時亦有大行人亦屬秋官否也禮記疏引鄭云堯時祝融爲司馬說苑又云堯時契爲司馬緯書又云棄爲司馬是唐虞本有司馬夏因而不改杜氏通典云禹元孫之子微爲夏司馬是矣合而言之政有八官實六也夏制上因唐虞下亦略同周禮也

皇清經解續編卷千九十六終

元和管禮昌校  
新陽汪之昌校

皇清經解卷第十四中

嶽也

嶽也

嶽也

嶽也

嶽也

嶽也

嶽也

嶽也



